

# Faulo ena leta nugweta me Kolinita 'idia

## Leta ana alamani weaqina

Kolinita taha 'abaga di'we Akaya gamonaya, ta me Loma edi 'ebeluvine ana 'abaga qiduana be kaikaiwabuna. 'Inega 'abaga~nana 'inaya tomotau qabudi itoatoa, ta tovegimwane be, tovekaikaiwabu ta wese toluvineavo qiduqiduadi edi 'abaga. Ta totoa 'abaga mali di'we be mali di'we 'idiega iva'auta mai 'abaga~nana 'inaya. Ta taudi 'ebeiwa'odu taha taha be, wese ilivu dumadumadi be dumadumadi, ta wese mali nuanua be mali nuanua imiedi. Faulo ena luvivila vemagilafuna 'inaya Iesu Valena ana lugaihi weaqina 'ekalesia 'wadia 'abaga~nana 'inaya. Ta 'abibodanaya me Kolinita vona ta wese vetal'a'i letayega ivetunei 'inaya, mana 'ekalesia ana ilivu be yani taha taha weaqina nuadi ge da'eqa'uya. Ta wese Faulo edi ilivu weaqina noqolia, 'inega nuanuana nagivetunuqidi. 'Inegana Faulo ba'e leta~nana 'wayavia me Kolinita 'idia, mana nuanuana nave'ita aqiaqidi 'ekalesia yawaina ana ve'eda weaqina. 'Inega ve'itedi yani taha taha weaqina 'idewani ve'aidega be, veiaiana be, vaqivaqidi edi toa aqiaqina be, Niboana Gwalagwalana ena wil'a be, veyoluba ilivuna be, nei kavovo ta wese Iesu ena ya'itoto 'evivi weaqina ve'itedi. E ba'e leta~nana ana 'iu.

## Leta gamona

1:1-9 Vemamatamagilafu be venoqi lukaiwa maega

1:10–4:21 Vetoatoasi'i 'ekalesia gamonaya

5:1–7:40 Velamo'eno kavokavovo be susu yawaidi weaqina

8:1–11:1 Tovetumaqana be wese tonoga weaqidi

11:2–14:40 Tafwalolo ana ve'eda ta wese awatubo weaqina

15:1–58 Iesu ena ya'itoto 'evivi 'aligega ta wese tovetumaqana edi ya'itoto 'evivi

16:1–4 Nei kavovo to'ekalesia di'we Iudia 'idia

16:5–24 Faulo ena nuanua be ena vona 'ebelu'ovoa

---

## Lukaiwa

**1** <sup>1</sup>Lova Yaubada ena nuanua 'inega ya'a Faulo venua'ivinegu be yavetovaletuyana Iesu Keliso weaqina. Ta leta ba'e ya'a ta wese

taida Sositeni 'imega.

<sup>2</sup> Ta ba'e leta~nana waiwai omi'a Yaubada ena 'ekalesia 'abaga qiduana Kolinita 'inaya otoatoa weaqimi. Omi'a Yaubada ni'a venua'ivinem ena tomotauyavo ta givegwalemi Ieis Keliso ena viaqa 'inega, 'idewani tomotau di'we qabudi 'idia itoatoa ni'a givegwaledi 'eguma taudi wese eda Kaiwabu Ieis Keliso ana wawa ivetumaqanea. Taudi be wese ita'a eda Kaiwabu 'aidegana.

<sup>3</sup> Avevenoqi weaqimi Tamada Yaubada be eda Kaiwabu Ieis Keliso nuakolokolo ta wese nuadaumwala ina neimi.

### Faulo ena lukaiwa Yaubada 'inaya me Kolinita weaqidi

<sup>4</sup> Omi'a weaqimi yalulukaiwa Yaubada 'inaya tuta qabuna, mana ena nuakolokolo qiduana neimi emi veiaiana Ieis Keliso 'inega. <sup>5-6</sup> Lova Ieis Keliso Valena alugaihi aqiaqiea 'imia, ta Vale~nana ovetumaqanea e 'inega vave'abi aqiaqi yawaimi 'inaya. Ta emi ve'aidega Ieis maega 'inega emi viaqayavo qabudi iveaqiaqi otaqa, 'idewani emi vonayavo venua'ewa'ewa, ta wese emi alamani Yaubada be, Keliso ta wese tovetumaqana edi toatoa weaqina veaqiaqi otaqa. <sup>7</sup> Inegana Yaubada Niboanina Gwalagwalana ena wila'a qabudi ge taha 'idiega oda kusa, ta eda Kaiwabu Ieis Keliso ena 'ifoqe mai weaqina emi nuanua waiwaina 'inega oba'eba'eyea. <sup>8 a</sup> Tauna nagivewaiwaiemi ana laba tuta 'ebelu'ovo 'inaya, be yaqisa ge taha toga ana fata nave'ewemi tuta~nana eda Kaiwabu Ieis Keliso ena 'aubena qiduana 'inaya na'evivi namai bwa'obwa'oya. <sup>9 b</sup> Vonahaqiaqi, Yaubada ba'e yani diavona naviaqidi weaqimi, mana tauna ma ana vetumaqana. Ta tauna ni'a venua'ivinem eniaiana aqiaqina 'inaya, Natuna Ieis Keliso eda Kaiwabu 'inega.

### Faulo nuanuana ina ve'aidega

<sup>10 c</sup> 'Inega egwavo, egu nuanua waiwaina ba'e ona noqolia! Eda Kaiwabu Ieis Keliso ana wawega yavonem ona lua'u ve'ae'aetoga nuanumia. Nuanuagu ona ve'aidega be yaqisa vetoatoasi'i ge wese na'eno'eno 'ekalesia gamonaya. Ta 'esi ma emiavo emi toa nave'aidega ta wese emi nuanua 'aideganega yani qabuna ona viaqidi. <sup>11</sup> Egwavo, egu nuanua ba'e 'idewani mana Kilo edi susu 'inega vaidi tomotau ni'a ivematamagilafuyegu emi ve'ae'aetoga weaqina. <sup>12 d</sup> Emi ve'ae'aetoga ba'e 'idewani, vaina ovonaya, "Ima'a Faulo a'abi'abibodea!" ta vaina ovonaya, "Ima'a Afolosa a'abi'abibodea!" ta vaina ovonaya, "Ima'a Fita a'abi'abibodea!" ta wese vaina ovonaya, "Ima'a Keliso a'abi'abibodea!"

<sup>13</sup> Ba'e 'inega ana 'ita kavona Keliso foa adi yau o'abi'abibodedi, waisa? Nage ya'a Faulo itutuve'ewegu 'etoluai 'inaya weaqimi? Gebu'e

<sup>a</sup> 1:8 1Te 3:13; 5:23    <sup>b</sup> 1:9 1Ion 1:3; 1Te 5:24    <sup>c</sup> 1:10 Fil 2:2    <sup>d</sup> 1:12 1Kol 3:4; Via 18:24-28

otaqa! Nage ya'a Faulo agu wawega babitaiso o'ewea? Gebu'e otaqa! <sup>14 e</sup> Vonahaqiaqi, ya'a Kilisifasi be Gaiusi magilafudimo yagivebabitaisodi lova tuta~nana omi'a ya'a maega katoatoa, ta ge taha toga wese 'imiega eda givebabitaisoi. Ta ba'e weaqina yalulukaiwa Yaubada 'inaya, <sup>15 f</sup> fole wese vaina 'imiega oda vonaya, "Ya'a Faulo ana wawega yababitaiso." <sup>16 f</sup> (Ei, nuagu fania, Setefano me ena susuyavo wese yagivebabitaisodi, ta yanuaia ge taha toga wese baabitaiso da'ewei 'iguyega, ta adi 'aidegamo.) <sup>17</sup> Keliso ge davetunegu tomotau 'idia sabi babitaisodi, ta 'esi veturnegu 'idia sabi lugaihi weaqina. Ta Vale~nana ge eda lugaihiea taugu egu vona 'inega, ta 'esi Yaubada ena venuaha'u 'inega, fole Keliso ena 'aliga 'etoluai 'inaya Valena ena waiwai eda givedawalilia.

### **Yaubada ena waiwai kana 'itea Keliso ana 'etoluai 'inaya**

<sup>18 g</sup> Vonahaqiaqi, Keliso ena 'aliga 'etoluai 'inaya Valena ana noqola kavona yani kavokavovo taudi 'aliga ana 'eda 'inega itautauya 'idia. Ta 'esi ita'a 'eto'etoyavuidi Yaubada ena waiwai kahalamani aqiaqiea Vale~nana 'inega. <sup>19 h</sup> Mana Buki Nugwenugweina 'inaya Yaubada vonaya,

"Ya'a toalamani qiduqiduadi bwa'obwa'oya  
edi alamani ena luveawalia,  
ta wese toalamani aqiaqi  
edi nua'eqa'u ena 'ewa yavulea."

<sup>20 i</sup> Ba'e vona diavona vonahaqiaqi, 'inega kana nuanua: Tola'ai na'ifoqe taudi toalamani qiduqiduadi 'idia? Ta tola'ai na'ifoqe Moses ena luvine ana tove'itayavo 'idia? Ta wese tola'ai na'ifoqe tove'ae'aetoga waiwai ta aqiaqidi 'idia ba'e bwa'obwa'oya itoatoa? Vonahaqiaqi, Yaubada ba'e qabu diavona edi alamani ni'a veyani kavokavovoyea, <sup>21 j</sup> mana ana 'aidegamo Toalamani aqiaqi, ta ena nuanua ba'e 'idewani: Bwa'obwa'o ana tomotauyavo ge adi fata be taudi edi alamaniega tauna ina alamani aqiaqie. 'Inegana Yaubada nuanuana tovetumaqana na'etoyavuidi Natuna ena 'aliga 'etoluai 'inaya Valena 'inega. Ta Yaubada ema lugaihi kavokavovo vefeweababi 'etoyavuidi. <sup>22</sup> Taudi me Diu nuanuadi 'ebe'ita mahalega ina 'itedi, ta taudi ge me Diu alamani isalisalia. <sup>23 k</sup> Ta ima'a Iesu ana tutuve'ewa 'etoluai 'inaya Valena alulugaihiea qabu diavona 'idia, 'inega me Diu nuadi lufeifa, ta taudi ge me Diu lugaihi~nana i'awaluveifea. <sup>24 l</sup> Ta Yaubada me Diu be wese taudi ge me Diu ni'a gabedi sabi 'etoyavuidi. Ta tomeqabu 'idiega gaba~nana ni'a i'awahaqiaqiea, e taudi Yaubada ena waiwai ni'a ivebaea Keliso 'inega, ta wese Keliso~nana 'inega Yaubada ena alamani aqiaqi otaqina ialamani aqiaqiea. <sup>25 m</sup>

<sup>e</sup> 1:14 Via 18:8; Lom 16:23    <sup>f</sup> 1:16 1Kol 16:15    <sup>g</sup> 1:18 Lom 1:16    <sup>h</sup> 1:19 Ais 29:14

<sup>i</sup> 1:20 Ais 19:12; 33:18; 44:25; Iob 12:17    <sup>j</sup> 1:21 Md 11:25    <sup>k</sup> 1:23 Lom 9:32; 1Kol 2:14

<sup>l</sup> 1:24 Kol 2:3    <sup>m</sup> 1:25 2Kol 13:4

Tomotau vaidi ivonaya be Yaubada ena viaqa, viaqa kwavakwavana tuta~nana Natuna awafelea 'etoluai 'inaya. Ta Yaubada ena alamani tomotau edi alamani veqidua va'inea. Ta wese 'idewani tuta~nana Natuna awafelea 'etoluai 'inaya, 'inega tomotau ivonaya be Yaubada ena viaqa dawalilina. Ta vonahaqiaqi, Yaubada ena viaqa ba'ena tomotau edi viaqayavo qabudi veqidua va'inea.

<sup>26<sup>n</sup></sup> Egwavo, ona nuaia lova omi'a ge ami wawamo, 'inega tomotau ivonaya be emi qabu 'inega ge 'ealimi toalamani, ta ge 'ealimi toluvine, ta wese ge 'ealimi gade kaikaiwabuna 'idiega oda vi'oi, ta tua Yaubada gabemi. <sup>27</sup>Vonahaqiaqi, bwa'obwa'o ana tomotauyavo ivonaya be omi'a tomotau kwavakwavami. Ta Yaubada tovekwavakwava venua'ivinedi bwa'obwa'o ana toalamaniavo sabi giveiniyauyaunidi. Ta wese bwa'obwa'o ana totoayavo ivonaya be omi'a dawalilimi. Ta 'esi Yaubada todawalilidi venua'ivinedi bwa'obwa'o ana tovewaiwaiavo sabi giveiniyauyaunidi. <sup>28</sup>Bwa'obwa'o ana totoayavo vaidi tomotau i'ita webuiedi ta wese iveryani kavovoyedi, e taudina Yaubada venua'ivinedi. Ta ba'e 'idewani Yaubada viaquia bwa'obwa'o ana totoayavo edi nuanua sabi luveawalina. <sup>29<sup>o</sup></sup> Yaubada ena nuanua ba'e 'idewani be yaqisa ge taha toga matanaya ana fata taunega nagivaneyei.

<sup>30<sup>p</sup></sup> Yaubada ena viaqa 'inega luvetubemi Ieis Keliso maega. Ta Keliso~nana Yaubada ena alamani aqiaqi otaqina ve'itaya 'iday. Ta Ieis ena viaqa 'inega ni'au kavetunutunuqa ta wese gwalagwalada Yaubada matanaya. Ta wese Ieis eda lufeifanayavo 'idiega ni'a 'etoyavuida. <sup>31<sup>q</sup></sup> 'Inega Buki Nugwenugweina ena vona kana 'abibodea vonaya, "Eguma taha toga nuanuana navonavane ana 'etoyavua weaqina, e 'inega luarqiaqiea be eda Kaiwabu ana 'aidega otaqa ana wawa nagivaneyea."

### Keliso ena 'aliga 'etoluai 'inaya yani qidua otaqina

**2** <sup>1</sup>Tovetumaqana ye, lova Yaubada ena vona 'wai'waivina Ieisu weaqina maduve'ifoqeyea 'iguya, ta 'abibodanaya yamai 'imia Valena sabi lugaihina. Ta ge vona qiduqiduadi nage ve'ita vitavitadi 'idiega Vale~nana eda simanei 'imia. <sup>2</sup>Mana tuta~nana yamai 'imia 'inega egu nuanua waiwaina ena lugaihi Ieis Keliso Valena Aqiaqina ta ana tutuve'ewa weaqina, ta ge taha wese tola'ai weaqina. <sup>3<sup>r</sup></sup> Vonahaqiaqi, ya'a me egu dawalili ta me egu mwaniniva ta wese me egu dedela qiduana ya'ifoqe 'imia. <sup>4<sup>s</sup></sup> Ta egu lugaihi be egu ve'ita ge eda neimi totoa bwa'obwa'o edi alamani 'inega nage vona nua'ewa'ewadi 'idiega, ta 'esi Yaubada Niboanina ena waiwaiyea. <sup>5</sup>Ba'e 'idewani yaviaqia, be yaqisa

<sup>n</sup> 1:26 Md 11:25; Iem 2:5    <sup>o</sup> 1:29 Efe 2:9    <sup>p</sup> 1:30 Iel 23:5-6    <sup>q</sup> 1:31 Iel 9:24

<sup>r</sup> 2:3 Via 18:9; 2Kol 10:1    <sup>s</sup> 2:4 1Te 1:5

emi vetumaqana ana avutugu ona a'uya Yaubada ena waiwai 'inaya, ta gebu tomotau edi alamani 'inega.

### **Yaubada ena alamani aqiaqi neida Niboana Gwalagwalana 'inega**

<sup>6</sup>Ta ima'a alamani aqiaqi Yaubada 'inega aveve'itayea tovetumaqana fa'alidi 'idia. Ta ba'e alamani~nana gebu bwa'obwa'o ana alamani 'idewani, ta wese gebu bwa'obwa'o ana toluvineavo edi alamani 'idewana, mana toluvine diavona Yaubada naluveawalidi. <sup>7</sup>Vonahaqiaqi, ima'a taudi totoa bwa'obwa'o edi alamani 'inega ge ada ve'itemi, ta 'esi Yaubada ena alamani aqiaqi 'wai'waivina 'inega. Ba'e alamani~nana lova Yaubada 'waivea tomotau 'idiega, ta ba'e 'itagana ima'a alamani~nana asimasimanea 'imia. Yaubada alamani~nana ena nuenuega madu'iva'ava'aia eda 'ebeveaqiaqi otaqa weaqina, ta 'abiboda bwa'obwa' viaquia. <sup>8</sup>Ta bwa'obwa'o ana toluvineavo ge taha toga 'idiega nuana da'eqa'ui ba'e alamani~nana weaqina, mana 'eguma nuadi da'eqa'uya, e 'inega ge wese eda Kaiwabu aqiaqi otaqina ida tutuve'ewei 'etoluai 'inaya. <sup>9<sup>t</sup></sup> Ta ge ida alamania. 'Inega Buki Nugwenugweina taudi weaqidi simana vonaya,

“Tola'ai Yaubada lova 'iva'ava'aia  
taudi ana toveyolubayavo weaqidi  
ge taha toga da'itei,  
ta ge taha toga danoqoli  
ta wese ge taha toga nuana da'eqa'ui.”

<sup>10</sup>Ta ima'a tovaluetuyana yani~nana ni'a ahalamania, mana Yaubada Niboanina 'inega give'ifoqeyea 'imaya. Vonahaqiaqi, Niboani~nana yani qabuna Yaubada weaqina ana fata nagive'ifoqeyedy 'imaya, mana tauna yani qabuna alahalamaniidi, ta wese Yaubada ena nuanua 'wai'waividi alamani aqiaqed. <sup>11</sup>Kana nuaia ita'a tomotau weaqida. Ge taha toga ana fata mali tomotau ena nuanua nahalamania, ta 'esi tomotau~nana niboanina 'inaya toatoa ana 'aidega ena nuanuayavo ana toalamani. Ta wese 'idewani Yaubada weaqina. Ge taha toga Yaubada ena nuanuayavo ana fata nahalamaniidi, ta 'esi Niboanina ana 'aidega yani qabuna alahalamaniidi Yaubada ena nuanua weaqina. <sup>12</sup>Ima'a gebu bwa'obwa'o niboanina ada 'ewei, ta 'esi Niboana Yaubada 'inega ni'a a'eweia. Vonahaqiaqi, Niboani~nana a'eweia be yaqisa ena iula 'inega Yaubada ena nei kavovo qabudi 'imaya weaqidi nuama na'eqa'uya. <sup>13</sup>'Inega yani diavona weaqidi ba'e 'itagana asimasimana 'imia ge totoa bwa'obwa'o edi alamani 'inega, ta 'esi Yaubada Niboanina 'inega. Ta ima'a taudi tovetumaqana fa'alidi 'eguma taha yani Yaubada Niboanina weaqina nuanuama ana givesimatalia 'idia, e 'inega Niboana~nana ena vona

<sup>t</sup> 2:9 Ais 64:4

'inega agigivesimatalia. <sup>14</sup>Ta 'eguma taha toga yawaina ge dahawafelea Yaubada 'inaya, e 'inega tomotau~nana ge ana fata Yaubada ena ve'ita aqiaqidi Niboanina 'inega na'awahaqiaqiedi. Tauna yani diavona weaqidi nuana nawale ge da'eqa'ui, 'inega ge wese danuanua weaqidi, mana ve'ita~nana adi aqiaqi ge ada fata kana alamanidi 'eguma Yaubada Niboanina 'idayo ge datoatoa. <sup>15</sup>Ta 'eguma taha tomotau Yaubada Niboanina 'inaya toatoa, e 'inega ana fata yani qabudi weaqidi nuana navetonova aqiaqiea, be 'inega nahalamania tola'ai aqiaqina ta wese tola'ai luveifana. Ta ge taha toga ana fata tomotau~nana na'awaluveifei ena viaqa aqiaqidi weaqidi. <sup>16</sup><sup>u</sup> Mana Buki Nugwenugweina vonaya,

"Togama ana fata be

eda Kaiwabu ena nuanua  
nahalamania?

Ge taha toga!

Ta wese togama ana fata be  
eda Kaiwabu navonei  
tol'a'i naviaqi?

Ge taha toga!"

Ta ima'a ama fata ba'e yani diavona ana alamanidi, mana ima'a ema nuanua 'idewani Keliso ena nuanua.

### Faulo be Afolosa Keliso ena tofewayavo 'ekalesia 'inaya

**3** <sup>1</sup>Egwavo, lova ge agu fata be ena ve'itemi 'idewani yaveve'ita taudi Yaubada Niboanina 'idia toatoa. Ta 'esi yave'itemi kavona omi'a totoa bwa'obwa'o edi ilivuyega oveeilivu 'aipa. Mana ana 'ita kavona omi'a nuami nawale ge da'eqa'uya tovetumaqana edi ilivu weaqina, e 'inega emi toa Keliso ena 'ekalesia gamonaya kavona gogama sususudi. <sup>2</sup><sup>v</sup> 'Inega lova gebu 'abwaga otaqa eda ve'ainimi, ta 'esi kavona susu yaneimi, mana omi'a ge ami fata be 'abwaga falafalana oda 'aini. Ta wese ba'itagana nawale ge ami fata, <sup>3</sup><sup>w</sup> mana omi'a emi toa nawale kavona totoa bwa'obwa'o edi ilivu 'idewana. Emi 'ekalesia nuaninaya ve'ifi'ifi be wese ve'ae'aetoga ilivu diavona i'eno'eno. Ta ba'e 'inega omi'a kavona totoa bwa'obwa'o, waisa? <sup>4</sup><sup>x</sup> Mana vaina 'imiega ovonaya, "Ima'a Faulo a'abi'abibodeal!" Ta vaina ovonaya, "Ima'a Afolosa a'abi'abibodea!" Ta ba'e ilivu~nana 'inega, ana 'ita kavona omi'a totoa bwa'obwa'o edi ilivu 'idewani, waisa?

<sup>5</sup><sup>y</sup> Ona nuaia, nage Afolosa yani qiduana? Gebu! Nage ya'a Faulo yani qiduana? Gebu! 'Inega tola'ai weaqina ogivaneyema? Mana ima'a tomotau kavokavovo ta Yaubada ena tofewayavo. Eda Kaiwabu ima'a

<sup>u</sup> 2:16 Ais 40:13   <sup>v</sup> 3:2 Ibe 5:12-13; 1Fit 2:2   <sup>w</sup> 3:3 1Kol 1:10-11   <sup>x</sup> 3:4 1Kol 1:12

<sup>y</sup> 3:5-6 Via 18:4,11,27-28

magilafuma ema fewayavo neima 'inega aviaaviaqidi. Ta ema lugaihi 'inega ove'ale Keliso ovetumaqanea. <sup>6</sup> Ta ema fewa 'imia kavona vaoqa ana fewa 'idewani, mana ya'a Faulo Yaubada ena vona vewanina ya'wadia be Afolosa vewani~nana 'itamakia, ta Yaubada givetaboya. <sup>7</sup> Inega to'wadi~nana be wese to'itamaki~nana ge yani qiduana, ta 'esi Yaubada yani qiduana, mana tauna yani qabudi adi togivetabo. <sup>8z</sup> 'Inega to'wadi~nana be wese to'itamaki~nana iveveiuiula ta edi fewa 'iuna 'aidegana. Ta edi gwavubiga ana 'etofwafwa 'inega ve'ia dumadumana be dumadumana ina lobeia Yaubada 'inega. <sup>9</sup> Mana ima'a Yaubada maega afewafewa, ta omi'a kavona Yaubada ena vaoqa. Ta wese omi'a kavona Yaubada ena vanue.

<sup>10</sup> Vona sesebai 'ekalesia ana yoqona weaqina ona noqolia, e ba'e: Yaubada ena veyolubega alamani neigu vanue ana yoqona weaqina, 'inega fewa~nana yaviaviaqia. Ya'a vanue~nana ana 'oqolayavo yavetovolodi, ta ba'itaga Yaubada ena tofewayavo 'oqola diavona 'idia i'e'eyoqona. Ta to'eyoqona 'aidega 'aidega luquiaqiea be taunega nanuanua aqiaqi ma'oda e'eyoqona 'aiqa. <sup>11a</sup> Ge taha toga ana fata mali 'oqola navetovoloi, mana ni'a vevetovolona, e omo'e 'oqola~nana tauna Ieius Keliso. <sup>12</sup> Eguma taha to'eyoqona yoana aqiaqidi ta falafaladi 'idiega na'eyoqona ta wese 'eguma taha to'eyoqona yoana kavokavovo 'idiega na'eyoqona, <sup>13b</sup> e 'inega luvine ana 'aubena 'inaya to'eyoqona 'aidega 'aidega edi fewayavo kana 'itedi vunavunaqaya. Ta 'aubena~nana namai 'aiwe saesaelina maega, ta ba'e 'aiwe~nana 'inega Yaubada to'eyoqona 'aidega 'aidega edi fewayavo nagabu tonovidi. <sup>14</sup> Ta 'eguma 'aiwe saesaelina ge ana fata to'eyoqona taha ena vanue na'alai, e 'inega tauna ve'ia aqiaqina na'eweia. <sup>15</sup> Ta 'eguma taha to'eyoqona ena vanue 'aiwe saesaelina na'ala 'ovoia, e 'inega tauna ge taha ve'ia nalobei. Vonahaqiaqi, to'eyoqona~nana veilaqe qiduana na'ifoqe 'inaya be tuta goyona da'aliga, ta tua Yaubada ena nuakolokolo 'inega 'etoyavua nalobeia, ta kavona 'aiwe saesaelina 'inega dadenadena.

<sup>16c</sup> Nage ge oda oalamania omi'a qabumi Yaubada ena vanue gwalagwalana ta Niboanina 'imia toatoa? <sup>17</sup> Eguma taha toga Yaubada ena vanue naqeunia, e 'inega tomotau~nana luvematasabu qiduana nalobeia Yaubada 'inega, mana Yaubada ena vanue gwalagwalana be vunavunaqina, ta ba'e vanue~nana omi'a tovetumaqana.

<sup>18</sup> Ge nuanuagu taha toga taunega nau'avei navonaya, "Ya'a toalamani aqiaqi!" Vaina 'imiega ovonaya be omi'a toalamani aqiaqi mana emi alamani kavona totoa bwa'obwa'o edi alamani ana 'etofwafwa 'idewani. Ta egu nuanua ge ona nuavane emi alamani weaqina, ta 'esi taudi

<sup>z</sup> 3:8-9 Md 16:27; Efe 2:20-22    <sup>a</sup> 3:11 Ais 28:16; 1Fit 2:4-6    <sup>b</sup> 3:13 1Kol 4:5

<sup>c</sup> 3:16 1Kol 6:19; 2Kol 6:16

Yaubada ge ida alamania ona awafeledi be ina 'awakwavakwavyayemi, be yaqisa Yaubada matanaya ona vetoalamani aqiaqi.<sup>19d</sup> Egu vona ba'e 'idewani, mana totoa bwa'obwa'o edi alamani yani kavokavovo Yaubada 'inaya. Buki Nugwenugweina ba'e yani~nana weaqina simana vonaya, "Tomotau Yaubada ge ida alamania ivonaya be taudi toalamani aqiaqi. Ta vonahaqiaqi, Yaubada ena nuanua 'inega taudiega isi'wesi'wedi alamani~nana 'inega",<sup>20e</sup> ta wese vonaya, "Eda Kaiwabu ni'a alamania bwa'obwa'o ana toalamaniavo edi alamani yani kavokavovo."<sup>21</sup> Inega ge wese daluaqiaqiembe ami tovanugwetayavo bwa'obwa'oya weaqidi ona vonavane, mana yani qabuna aqiaqidi ni'a o'ewedi emi toa aqiaqina weaqina.<sup>22</sup> E ana 'ebivetatalutulaba'e: Ya'a Faulo be, Fita ta wese Afolosa amai 'imia sabi ve'itami. Ta wese Yaubada yani qabuna 'iva'ava'aidi bwa'obwa'oya emi toa aqiaqina weaqina. 'Inega ge taha tola'ai 'eguma mayawaimi otoatoa, nage ona 'aliga, mana Yaubada ena tomotauyavo yawai vataya naneidi. Ta tola'ai na'ifoqe 'imia ba'e tuta~nana 'inaya, ta wese tuta maimai 'inaya, e Yaubada yani diavona navefewedem aqiaqina weaqina,<sup>23</sup> mana omi'a Keliso weaqina, ta Keliso Yaubada weaqina.

### Keliso ena tovaletuyayanavo edi fewa

**4** <sup>1</sup>Ge ona vonaya vonigo ima'a tove'ita tomotau qiduqiduama, ta 'esi ona nuaia ima'a Keliso ena tofewayavo 'idewani. Tauna vetumaganema be veyoveyoa neima, 'inega ena nuanua 'wai'waividagi givesimalidi 'imia.<sup>2f</sup> Ni'a kahalamania, 'eguma taha tofews navetovanugweta, 'inega luaqiaqiea be me ena gwavubiga fewa~nana naviaqia ena kaiwabu weaqina.<sup>3</sup> Egwavo, ya'a me egu gwavubiga egu fewa yaviaqia nuanimia, waisa? Vaina 'imiega ovonaya be ya'a egu fewa aqiaqina yaviaqia emi 'ekalesia 'inaya, ta vaina ovonaya be ge aqiaqina. Ta ya'a ge eda nuanua qiduana 'eguma omi'a nage mali qabu o'awahaqiaqiegus nage gebu. Ta wese ya'a ge agu fata be tauguyega eda 'awahaqiaqiegus.<sup>4</sup> Ta taugu agu lutonova aqiaqina Yaubada matanaya, mana egu alamani ana 'etofwafwa 'inega yanuaia be ge taha fewa luveifana eda viaqi emi 'ekalesia 'inaya. Ta ge eda alamani aqiaqiei 'eguma ya'a tofews tunutunuqigu. Ta eda Kaiwabu ana 'aidegamo egu ilivu qabuna alamani aqiaqiedi, 'inega taunamo ana fata naluvinegu.

<sup>5g</sup> 'Inega omi'a ge taha tomotau weaqina ona vonaya, "Ba'e tofews~nana aqiaqina, ta omo'ena luveifana." Ta 'esi luaqiaqiembe ona ba'eba'e Keliso ena 'aubena weaqina. Mana tauna velovelovana ana ilivu 'wai'waivididi nagive'ifoqeyedi vunavunaqaya, ta wese nuanua luveifadi 'wai'waivididi tomotau giwalidiega nagive'ifoqeyedi. Ta 'aubena~nana

<sup>d</sup> 3:19 Iob 5:13    <sup>e</sup> 3:20 Same 94:11    <sup>f</sup> 4:2 Lk 12:42    <sup>g</sup> 4:5 1Kol 3:8

'inaya tomotau qabudi awatubo ina lobe Yaubada 'inega edi viaqayavo adi aqiaqina 'inega.

### Ge tauda kana givaneyeda

<sup>6<sup>h</sup></sup> Egwavo, iada Afolosa ta ya'a ave'ebe'ita 'imia be yaqisa 'imega taha vona Buki Nugwenugweina ena simana ona alamani aqiaqiea, vonaya, "Buki~nana ana 'wayavi ona 'abibodea ta ge emi nuenuega ona luvetomanei." Mana 'eguma vona~nana ona 'abiboda aqiaqiea 'inega ge ona nuavane ta ona vonaya, "Ima'a ema tovanugweta aqiaqina, ta 'abiboda omi'a emi tovanugweta." <sup>7<sup>i</sup></sup> Mana taumiega ge ona vonaya vonigo omi'a tomotau aqiaqimi, ta 'abiboda mali qabu. Yani qabuna 'imia i'eno'eno ge taumiega oda 'ewei, ta 'esi Yaubada ena nei kavovo 'inega ni'a o'ewedidi. Ta 'eguma yani qabuna nei kavovoyega ni'a olobedi, 'inega tola'ai weaqina taumiega ogivaneyemi kavona omi'a emi waiwaitega oda 'ewedidi?

<sup>8</sup> Omi'a me Kolinita ovonaya be yani qabudi emi toa aqiaqina weaqina ni'a oda 'ewedidi, waisa? Ta gebu! Ta wese ovonaya be Niboana Gwalagwalana ena wila'a qabudi ni'a oda 'ewedidi, waisa? Ta gebu! Ta wese ovonaya vonigo ni'a oda vetovanugweta 'ekalesia gamonaya, be taumiega ami fata ona vanugwetemi. Omi'a emi ilivu kavona ni'a oda vekini. Vonahaqiaqi, egu nuanua qiduana vonigo oda vekini, 'inega qabuda 'ekalesia ana vanugweta weaqina eda fewa dave'aidega. Ta gebu! <sup>9</sup> Ta ana 'ita kavona ima'a tovaletuyanayavo Yaubada dahanuma tomotau qabudi 'abibodadia. Ta kavona ida kafima ida yoqonima ta toluavia 'abibodadiuga ida lihimma ida tautauyema sabi luve'aligima tomotau matadia. Ta omo'e 'inaya ina vevekovema ta wese ina kolukolua. Ta yani ba'e 'ifo'ifoqe totoa bwa'obwa'o qabudi matadia, ta wese Yaubada ena tovale'ewayavo matadia.

<sup>10</sup> Ima'a Keliso ena tofewayavo tomotau i'awakwavakwavyema, ta emi ve'aidega Keliso maega 'inega, taumiega ovonaya be omi'a toalamani aqiaqi, waisa? Ta gebu! Tomotau ivonaya be ima'a dawalilima, ta omi'a ovonaya be waiwaimi, waisa? Ta gebu! Tomotau i'amayabemi, ta ima'a ge taha 'amayaba ada lobe Yaubada 'idiega. <sup>11<sup>j</sup></sup> Lova 'inega be ana laba ba'itaganan botana qiduana alobelobe, ta wese magama kwavukwavuqa. Ama kaleko eabuabudi, ta tomotau ivunuvinuqima, ta wese ge ema 'ebe'enomo. <sup>12<sup>k</sup></sup> Taumega afewafewa waiwai ama 'abwaga weaqina. Tomotau ivonavona ve'alatema, ta ima'a avonavona veyolubedi. Tomotau ivevevoalanema, ta ima'a me ema bibitaqo atovotovolo'i'ita. <sup>13</sup> Tomotau i'awa'awa luveifema, ta ima'a avonavona 'eviviedi vona biganega. Ta ana laba ba'itaganan tomotau iveilivu veifema kavona ima'a qaina kavokavovo 'idewani.

<sup>h</sup> 4:6 Lom 12:3   <sup>i</sup> 4:7 Lom 12:6   <sup>j</sup> 4:11 2Kol 11:23-27   <sup>k</sup> 4:12 2Te 3:8; Md 5:44

<sup>14</sup> Ba'e yani diavona weaqina ge eda 'waya'wayavidi 'imia sabi giveiniuyaunimi, ta 'esi nuanuagu egu vona ona nua'eqa'u aqiaqiedi, mana omi'a kavona natu otaqigwavo. <sup>15<sup>l</sup></sup> Nage tove'ita 'ea'ealidi ni'a ive'itemi Keliso weaqina, ta tamamiavo ge 'ealidi, ta 'esi ya'a agu 'aidegamo tamami, mana Iesu Keliso Valena Aqiaqina ana lugaihi 'imia 'inega yavetama weaqimi. <sup>16<sup>m</sup></sup> 'Inegana yavevenoqiemi qiduana ona vetutumegu.

<sup>17<sup>n</sup></sup> Vonahaqiaqi, egu nuanua ba'e weaqina Timoti yavetunei waiwai 'imia. Tauna ya'awanatunea ta yaveyolubea qiduana. Tauna ma ana vetumaqana, ta ena gwavubiga Keliso weaqina yahalamani aqiaqiea. Timoti nave'ita 'eviviemi egu toa vauvauna Keliso maega weaqina. Ba'e ve'ita~nana yaveve'itayea 'ekalesia taha taha di'we qabudi 'idia.

<sup>18</sup> Vaina 'imiega ovonaya, "Faulo ge wese navayausa 'evivieda." 'Inega onuavane ta taumi emi nuanua oviaviaqidi. <sup>19</sup> Ta 'esi ya'a tuta kukusana 'inaya ena wai 'imia ena vayausimi 'eguma eda Kaiwabu ena nuanua wese 'idewani. Ta omo'e tuta~nana 'inaya tonuavane diavona ena 'ita aqiaqiedi 'eguma Yaubada ena waiwaienga edi viaqayavo iviaviaqidi, nage ivonavonamo. <sup>20<sup>o</sup></sup> Mana tuta~nana kahawafeleda Yaubada ena luvine 'inaya, 'inega wese ena waiwai neida be yaqisa ada fata ena ilivu kana 'abibodea ta ena fewa kana viaqia. Ta 'eguma ita'a kana vonamo ta ena fewa ge kana viaqi, e ba'e 'inega ana 'ita kavona ita'a ge ena tomotauyavo. <sup>21</sup> Isana ma'oda ena veilivu 'aiqemi tuta~nana ena wai 'imia? Vonahaqiaqi, 'eguma nawale onuanua vane, e 'inega luaqiaqiegu be ena luvematasabumi. Ta 'eguma ona nuawebui, e 'inega me egu ve yoluba be wese egu nuanua biganega ena veilivu aqiaqiei.

### Taha ilivu lufeifa otaqina 'ekalesia gamonaya

**5** <sup>1<sup>p</sup></sup> Vale taha weaqimi ni'a yanoqolia, ta vale~nana lufeifa otaqina. Tomotau ivonegu vonigo taha 'oloto emi 'ekalesia gamonega tamana moqanena maega ivelamo'eno. Vonahaqiaqi, ba'e ilivu~nana lufeifa otaqina, mana tomotau Yaubada ge ida alamania ba'e ilivu~nana ge wese ida viaqia. <sup>2<sup>q</sup></sup> 'Inega luaqiaqiegu be ona nuavita ta wese ona dou ilivu~nana weaqina, ta tua omi'a nawale me emi nuavane otoatoa. Ta tola'ai weaqina 'oloto~nana ge oda a'u'ifoqeyei 'ekalesia 'inega?

<sup>3<sup>q</sup></sup> Ya'a yatoa luluvai 'imiega, ta niboanigu 'inega kavona omi'a maega kada toatoa. 'Inega 'oloto~nana luvine ni'a yaneia ena lufeifana weaqina. <sup>4-5<sup>r</sup></sup> Iesu Keliso ana wawega ona toa va'auta, 'inega ya'a niboanigu omi'a maega kana toatoa ta Iesu Keliso ena waiwai na'eno'eno nuanimia. 'Inega 'oloto~nana ona a'u'ifoqeyea 'ekalesia 'inega kavona be oda

---

<sup>1</sup> 4:15 Gal 4:19    <sup>m</sup> 4:16 Fil 3:17    <sup>n</sup> 4:17 Via 19:22    <sup>o</sup> 4:20 1Kol 2:4    <sup>p</sup> 5:1 Luvi 18:7-8;  
Luve 22:30    <sup>q</sup> 5:3 Kol 2:5    <sup>r</sup> 5:4-5 1Tim 1:20

ve'ineieia Seitani 'inaya. 'Inega ena luveifana nahalamani aqiaquia be ena nuanua 'wafi ena qaiawa weaqina nanogea ta nanuagivila 'inega 'etoyavua nalobea eda Kaiwabu ena 'aubena 'inaya.

<sup>6</sup> <sup>s</sup> Ta omi'a ge daluaqiaqiem be ona nuavane, mana 'oloto~nana nawale 'ekalesia gamonaya okafikafia. Vona sesebai ba'e ena neimi: Isiti goyona 'inega falawa qabuna ana fata nadidina. <sup>7</sup> <sup>t</sup> 'Inega nuanuagu isiti nugwenugweina ona 'ewa yavulea 'ekalesia 'inega, be 'inega omi'a ona vevauvau kavona falawa ge ana isitimo 'idewani. Ta yavona aqiaqiem, omi'a 'idewanina ni'a otoatoa, mana Yaubada Keliso ni'a vegubayea kavona 'Auvivia Sagalina ana lami 'idewani eda luveifana weaqina. <sup>8</sup> <sup>u</sup> 'Inega 'Auvivia Sagalina ana 'abwaga kana 'ainia, ta gebu beledi isiti maega kana 'ainia, mana belidi~nana ilivu luveifana be wese nuanua luveifadi ana beledi. Ta 'esi beledi ge ana isitimo kana 'ainia, mana beledi~nana ilivu aqiaqina be wese vonahaqiaqi ana beledi.

<sup>9</sup> Egu leta lova ya'wayavia wai 'imia 'inaya yavemamatamgilafuyemi gebu tovelamo'eno kavokavovo maega ona veqabu 'aidega. <sup>10</sup> Ta vemamatamgilafu~nana 'inaya ge eda vona taudi Yaubada ge ida vetumaqanea weaqidi, mana taudi bwa'obwa'o ni'a iluveagatuna'ia, ta tuta qabuna iveauvelamo'eno be, iveauemanuguba be, ivanavanawala ta wese edi yaubada kavokavovoyavo iawahawatubodi. Mana 'eguma taudi weaqidi eda vemamatamgilafuyemi emi veqabu 'aidega weaqina, e 'inega bwa'obwa'o oda nogea, mana taudi qabu qiduadi, <sup>11</sup> <sup>v</sup> ta 'esi tomotau taudiega igabedi tovetumaqana weaqidi yavemamatamgilafuyemi. Ta edi ilivuyavo 'idewani velamo'eno be, vemanuguba be, yaubada kavokavovo iawahawatubodi be, 'aivegila be, go'ila waiwaina ana numa ta wese vanawala ilivu diavona iviaviaqidi. 'Inega taudi tomotau diavona ge wese maega ona 'ai vediu!

<sup>12-13</sup> <sup>w</sup> Ge daluaqiaqieg be Yaubada ana tovemwageavo ena luvinedi nage aqiaqidi nage luveifadi. Ta 'esi Yaubada taunega naluvinedi. Ta omi'a 'ekalesia luaqiaqiem be taumi ma emiavo ona luvinem. Buki Nugwenugweina ba'e yani~nana weaqina simana vonaya, "Eguma taha toga navelamo'eno kavokavovo 'inega ona a'usi'iea ami qabu 'inega."

### Kotu weaqina tovetumaqana nuanidia

**6** <sup>1</sup> Wese yani taha weaqina ena vonemi. 'Eguma taha vita nage ve'ae'aetoga na'ifoqe tovetumaqana magilafumi nuanimia, 'inega ge wese daluaqiaqiem be ona tauya tolувineavo taudi Yaubada ge ida alamania matadia vita~nana sabi givetunuqina, ta 'esi luaqiaqiem be ona tauya 'ekalesia ana tolувineavo 'idia ta vita~nana ona givetunuqia.

<sup>s</sup> 5:6 Gal 5:9    <sup>t</sup> 5:7 Ais 53:7; 1Fit 1:19    <sup>u</sup> 5:8 Luve 16:3    <sup>v</sup> 5:11 2Te 3:6; Tai 3:10

<sup>w</sup> 5:12-13 Luve 13:5; 17:7

<sup>2<sup>x</sup></sup> Nage ge oda alamania nawale taha tuta 'inaya ita'a tovetumaqanayavo totoa bwa'obwa'o qabudi kana luvinedi Yaubada ena nuanua 'inega. Ta 'eguma tuta maimai 'idia tomotau qabudi ona luvinedi, 'inega tola'ai weaqina ami vitayavo ge ami fata taumi ma emiavo ona givetunuqidi?

<sup>3</sup> Nage nuami nawale ge da'eqa'ui ita'a tovetumaqana mahala ana tovale'ewayavo wese kana vekotudi. 'Inega luaqiaqiemi be vita kavokavovo 'ekalesia gamonaya ami fata taumiega ona givetunuqidi, waisa? <sup>4</sup>'Inega tola'ai weaqina otautauya toluvine ge ida tafwalolo 'idia ami vitayavo sabi givetunuqidi? <sup>5</sup> Ba'e yani diavona yavonayed i'mia sabi giveiniyauyaunimi. Nage ge taha toalamani aqiaqi 'ekalesia gamonaya datoatoa be ve'ae'aetoga diavona ana fata nagivetunuqidi be naluvinemni? <sup>6</sup> Ta omi'a egu nuanua ge oda viaqia, mana tovetumaqana taha iana tautauyea toluvine taudi Keliso ge ida vetumaqanea matadia sabi luvinen.

<sup>7</sup>Ba'e ilivu~nana 'inega taumiega ni'a ogivedawalilimi. Ta luaqiaqiemi be 'eguma taha toga yani luveifana naviaquia 'imia, 'inega ge ona vekotui. Ta wese 'eguma taha toga nau'avemi be emi kulufayavo na'ekilidi ge wese ona vekotui. <sup>8</sup>Ta 'esi omi'a taumi ma emiavo wese luveifana oviaquia, mana u'avega kulufa taha taha o'ewe'ewedi tovetumaqana emiavo 'idiega.

<sup>9<sup>y</sup></sup> Ni'a oalamani aqiaqiea taudi toluveifadi ge wese Yaubada ena 'Ebeluvine 'inaya ina lugu, waisa? 'Inega taumiega ge ona u'avemi, mana tovelamo'eno be, yaubada kavokavovo adi toiw'a'odu be wese toluabu ge adi fata ina lugu 'Ebeluvine~nana 'inaya. Ta wese 'oloto 'eguma 'wafidi ina awafeledi mali tomotau 'idia mane weaqina ge adi fata ina lugu. Ta wese 'eguma 'oloto be 'oloto ina velamo'eno 'inega ge adi fata ina lugu. <sup>10</sup>Ta wese tovanawala be, tovemanuguba be, go'ilila waiwaina ana tonuma be, tovegila be wese taudi u'avega kulufa i'ewe'ewedi ge taha toga 'idiega adi fata be ina lugu 'Ebeluvine~nana 'inaya. <sup>11<sup>z</sup></sup> Lova omi'a vaimi wese ba'e ilivu diavona oviaqidi, ta ba'itagana lufeifa diavona Keliso 'utuyavuledi 'imiega 'inega vunavunaqimi. Ta eda Kaiwabu Ieisu Keliso be wese Yaubada Niboanina edi viaqa 'idiega ni'a ovetunutunuqa Yaubada matanaya.

#### **'Wafida kana awafeledi Yaubada weaqina**

<sup>12<sup>a</sup></sup> Vaina 'imiega ovonaya, "Ilivu qabudi ana fata kana viaqidi." Ta yavonevonemi, vaina ilivu ge wese naiulemi. Vonahaqiaqi, ilivu qabuna ada fata kana viaqidi, ta ge daluaqiaqieda 'eguma ilivu diavona ina vetoluvine 'idayu. <sup>13<sup>b</sup></sup> Vaina tomotau 'imiega ovonaya, "Eguma gamogu nuanuana 'abwaga, e 'inega 'abwaga ya'ai'ai, ta wese 'idewani 'eguma

<sup>x</sup> 6:2 Ve 20:4   <sup>y</sup> 6:9-10 Gal 5:19-21; Efe 5:5; Ve 22:15   <sup>z</sup> 6:11 Tai 3:3-7   <sup>a</sup> 6:12 1Kol 10:23

<sup>b</sup> 6:13 1Te 4:3-5

'wafigu nuanuana vavine, e 'inega 'wafigu ena nuanua yaviaviaquia." Vonahaqiaqi, Yaubada gamoda be wese 'abwaga 'iva'ava'aidi, ta nawale taha tuta 'inaya naluveawalidi. Ta Yaubada 'wafida ge da'iva'ava'aidi velamo'eno kavokavovo ana ilivu weaqina, ta 'esi 'wafida 'iva'ava'aia eda Kaiwabu weaqina, ta eda Kaiwabu 'wafida~nana ena aqiaqina weaqina nuanua.<sup>14c</sup> Ta Yaubada ena waiwaitega 'wafida nagiveya'itotodi 'idewani lova eda Kaiwabu giveya'itotoya 'aliga 'inega.<sup>15d</sup> Omi'a oalamani aqiaqiea ita'a 'wafida eda vetumaqana 'inega ni'a kaluvetubedi Keliso maega. Ta 'inega ma'oda, nage ana fata taha tovetumaqana 'wafina ni'a luluvetubana Keliso maega ta nahawafelea tokodada 'inaya ta ina velamo'eno? Gebu!<sup>16e</sup> Ta wese ni'a oalamani aqiaqiea 'eguma taha 'oloto navelamo'eno tokodada maega, e 'inega magilafudina ni'a ive'wafi 'aidega. Mana Buki Nugwenugweina 'inaya Yaubada vonaya, "Magilafudi ni'a ive'aidega."<sup>17f</sup> Ta 'esi 'eguma taha tomotau naluvetuba eda Kaiwabu maega, e 'inega niboanidiega tawa ive'aidega.

<sup>18</sup>Luaqiaqieda be velamo'eno ilivuna 'inega kana dena! Ba'e ilivu~nana ilivu lufeifadi qabudi 'idiega luveifa otaqina, mana ilivu~nana 'inega tau'u 'wafiu ugigiveluveifa.<sup>19</sup>Nage ge oda alamania 'wafimi Niboana Gwalagwalana ena vanue? Ta Niboana~nana 'imia toatoa Yaubada ena nei kavovo 'inega neimi. Vonahaqiaqi, Yaubada tauna emi Kaiwabu, 'inega ge taumiega ona luvinem, ta 'esi Yaubada naluvinem,<sup>20g</sup> mana maisa qidua va'inena 'inega gubaufemi. 'Inega luaqiaqiem be 'wafimiega Yaubada ana wawa ona awatuboya.

### Ve'ita vaqi weaqina

**7** <sup>1</sup>Lova leta 'inega yani taha taha weaqidi ovetal'aiegu, ta ba'e egu ve'ia 'imia. 'Oloto luaqiaqiedi 'eguma ge ina vaqi. <sup>2</sup>Ta velamo'eno kavokavovo ana ilivu veqidua va'ine emi 'abagaya, 'inega ami luaqiaqi be 'oloto 'aidega 'aidega navaqi be ma moqanena ina toatoa, ta wese vivine 'aidega 'aidega 'idewani, luaqiaqiedi be ina vaqi ta vavine taha taha ma moqanedi ina toatoa.

<sup>3</sup>'Eguma vavine vaqivaqidi edi nuanua ma moqanedi ina 'eno, e 'inega 'oloto~nana nahawafela edi nuanua 'inaya. Ta wese 'idewani 'eguma me'olotona nuanuana moqanena maega ina 'eno, e 'inega ina awafela moqanedi ena nuanua weaqina. <sup>4</sup>Vavine vaqivaqidi 'wafidi ge taudi adi 'aidega ida luvinea, ta 'esi moqanedi wese luluvinea. Ta wese 'idewani 'oloto vaqivaqina 'wafina ge tauna ana 'aidega daluvinea, ta 'esi moqanena wese iluluvinea. <sup>5</sup>'Inega 'oloto moqanena edi nuanua weaqina ge na'etobodedi, ta wese 'idewani vavine moqanedi ena nuanua weaqina

<sup>c</sup> 6:14 Lom 8:11; 1Kol 15:20; 2Kol 4:14   <sup>d</sup> 6:15 Efe 5:30   <sup>e</sup> 6:16 Md 19:5

<sup>f</sup> 6:17 Ion 17:21-23; Lom 8:9-11   <sup>g</sup> 6:20 1Kol 7:23; 1Fit 1:18-19

ge ina 'etobodei. Ta 'eguma magilafudi ina veqae ta edi nuanua 'aidegana 'inega ina vonaya, "Kana 'enosi'i ta kana awafeleda venoqi 'inaya." E aqiaqina 'idewana, ta tuta kukusana namo 'inaya ina toasi'i, mana nawale Seitani nasitonovidi 'inega ilivu lufeifana ina viaqia. Egu ve'ita ba'e 'idewani 'imia, mana ge ami fata taumiega ona 'itamaki aqiaqiemu tutu kuena 'inaya. <sup>6</sup>O'itei, egu ve'ita diavona ba'e 'inega ge luvine waiwaina eda neineimi be ona matayaga aqiaqiei, ta 'esi ba'e 'idewani egu lugaihi 'imia. <sup>7</sup>Ta egu nuanua qiduana tomotau qabudi ina 'abibodegu ta ge ina vaqi 'idewani ya'a ge eda vaqi. Ta ita'a tomotau qabuda ada wila'a ge 'aidegana, ta 'esi vaina adi wila'a Yaubada neidi be ina vaqi, ta wese vaina adi wila'a Yaubada neidi be ge ina vaqi 'inega kavona doqai ina toatoa.

<sup>8</sup>Ta wese ena ve'itemi taudi doqai be wadawada'e edi toa weaqina. Luqaqiedi be adi 'aidega ina toa 'idewani ya'a. <sup>9<sup>h</sup></sup> Ta 'eguma ge adi fata 'wafidi ina luvinedi 'inega luqaqiedi be ina vaqi, mana ge adi luqaqiqi 'eguma edi nuanua waiwaina 'inega ina awafeledi velamo'eno kavokavovo ana ilivu 'inaya.

<sup>10<sup>i</sup></sup> Ta vaqivaqidi wese taha luvine waiwaina yaneineidi. Ta ge ya'a 'iguyega, ta 'esi eda Kaiwabu 'inega. Ta luvine~nana ana alamani ba'e: Vavine vaqivaqidi moqanedi ge ina vesa'ili. <sup>11</sup>Ta tua 'eguma moqanedi ina nogea 'inega luqaqiedi be adi 'aidega ina toa, ta ge wese mali 'oloto maega ina vaqi 'evivi. Ta 'eguma nuanuadi 'oloto, e 'inega ina 'evivi adi sa'ila 'inaya. Ta wese 'idewani 'oloto vaqivaqidi ge wese moqanediavo ina nogedi.

<sup>12</sup> Wese taha yani weaqina ena ve'itemi. (Ta ve'ita~nana ya'a 'iguyega, ta ge eda Kaiwabu 'inega.) 'Ebevetalatutula ba'e ona noqolia: Tovetumaqana me'olotona vaqivaqina ma moqanena itoatoa, ta vavine~dina Ieis u ge ida vetumaqanea. Ta edi nuanua ma moqanedi ina toatoa, 'inega tovetumaqana~nana ge ana fata navesa'ilidi. <sup>13</sup>Ta wese 'idewani 'eguma vavine tovetumaqana moqanedi maega itoatoa, ta 'oloto~nana ge davetumaqana Ieis 'inaya. Ta 'eguma 'oloto~nana nuanuana moqanena maega ina toatoa, e 'inega vavine~dina ge adi fata moqanedi ina vesa'ili. <sup>14</sup>Egu luvine ba'e 'idewani, mana 'oloto~nana moqanena edi vetumaqana 'inega ni'a vevunavunaqa. Ta wese 'idewana vavine taudi ge ida vetumaqana, moqanedi ena vetumaqana 'inega ivenunavunaqa. Ta ba'e 'inega natudiavo ge bwavubwawudi, ta 'esi taudi wese ni'a ivenunavunaqa Yaubada matanaya. <sup>15<sup>j</sup></sup> Ta 'eguma vaqivaqidi itoatoa ta taha 'idiega ge davetumaqana Yaubada 'inaya ta tauna nuanuana moqanena nanogea, e 'inega tovetumaqana~nana ge duluaqiaqiei be moqanena na'etobodei, ta 'esi nahawafelei natauya. Ta 'eguma ba'e yani~nana na'ifoqe 'inega tovetumaqana~nana me'olotona

<sup>h</sup> 7:9 1Tim 5:14   <sup>i</sup> 7:10 Md 5:32   <sup>j</sup> 7:15 Lom 14:19

nage mevavinena vaqi ana luvine ge wese na'etobodedi. Vonahaqiaqi, Yaubada venua'ivineda toadaumwala weaqina.

<sup>16<sup>k</sup></sup>

Vavine tovetumaqana, ge ami fata be ona alamani aqiaqiei 'eguma moqanem 'etoyavua nalobeia emi vetumaqana 'inega. Ta wese 'idewani, o'a 'oloto tovetumaqana ge au fata be una alamani aqiaqiei 'eguma moqaneu 'etoyavua ina lobeia eu vetumaqana 'inega.

### Yaubada ena venua'ivina tomotau 'idia weaqina

<sup>17</sup>Ni'a yavonemi vaqi ana luvine weaqina, ta eda Kaiwabu toa dumadumana be dumadumana 'idia ni'a a'uda. 'Ebevetalatutula ba'e ona 'itea: Vaida vaqivaqida, ta vaida doqai, vaida me Diu, ta vaida ge me Diu, vaida tofawa yoqoyoqonida kaiwabuyavo weaqidi, ta vaida yavuyavuida. 'Inega 'eguma 'ebetoka diavona lova 'idia katoatoa tuta~nana Yaubada gabeda, e 'inega ge wese 'ebetoka diavona kana nogedi. Ba'e luvine~nana 'ekalesia 'aidega 'aidega 'idia yaveve'itedi. <sup>18</sup>'Eguma taha Diu 'olotona me Diu edi ilivu 'inega 'wafina ni'a ida'ea ta 'abibodanaya ve'ale Iesu vetumaqanea, 'inega da'a~nana weaqina ge wese nanuanua, ta 'esi natoatoa 'idewani. Ta wese 'idewani 'eguma taha 'oloto ve'ale Iesu vetumaqanea ta 'wafina ge ana da'amo, e 'inega ge wese nanuanua da'a~nana weaqina. <sup>19<sup>l</sup></sup>

Vonahaqiaqi, 'eguma taha toga 'wafi ana da'a ni'a 'eweia 'inega ge wese yani 'ena'ina, ta wese 'eguma taha toga 'wafi ana da'a ge da'ewei 'inega wese ge taha yani 'ena'ina. Ta yani qidua va'inena ba'e ona alamania: Yaubada ena luvineavo kana matayagedi.

<sup>20</sup>'Inega omi'a tomotau 'aidega 'aidega luqiaqialemi be ona toatoa 'idewani lova otoa tuta~nana Yaubada ena gaba onoqolia, ta ge wese emi toa ona givedumedumei. <sup>21</sup>'Inega 'eguma o'a taha kaiwabu ena tofawa yoqoyoqonina 'idewani utoatoa tuta~nana Yaubada gabeu, e 'inega toa~nana weaqina ge una nuanua, ta 'esi una 'awahaqiaqiea. Ta 'eguma au fata be yavua una lobeia, e 'inega yavua~nana ge wese una nogei. <sup>22<sup>m</sup></sup>

'Inega ge taha tola'ai 'eguma taha toga natoatoa tofawa yoqoyoqonina 'idewani tuta~nana eda Kaiwabu gabea, mana eda Kaiwabu Iesu ena viaqa 'idiega 'etoyavua lobeia ena ilivu luveifadi 'idiega. Ta 'eguma o'a yavuyavui tutu~nana eda Kaiwabu gabeu, 'inega ba'itaganakavona o'a Keliso ena tofawa yoqoyoqonina. <sup>23</sup>Yaubada maisa qiduana 'inega gubaufemi, 'inega ge ona awafelelemi tomotau 'idia be ina kafimi tofawa yoqoyoqonimi 'idewani. <sup>24</sup>'Inega taigwavo be novugwavo, lova tuta~nana Yaubada gabemi emi 'ebetoyaayo dumadumadi be dumadumadi 'idia otoatoa. Ta ba'e 'ebetoka diavona ona 'awahaqiaqiedi ta ge ona givedumedumi, mana ba'itaganakavona omi'a Yaubada maega otoatoa.

<sup>25</sup>Ta wese emi vetala'ai iahaba edi toa weaqina ena ve'iea. Ge taha luvine eda Kaiwabu 'inega ena neimi, ta 'esi ya'a egu nuanua 'inega ena

<sup>k</sup> 7:16 1Fit 3:1   <sup>l</sup> 7:19 Lom 2:25; Gal 5:6; 6:15   <sup>m</sup> 7:22 Fim 16; 1Fit 2:16

ve'itemi. Ta Kaiwabu ena nuakolokoloyega alamani aqiaqi neigu, 'inega ona vetumaqana aqiaqiegu ve'ita~nana 'inaya.<sup>26</sup> Tuta ba'ena tuta vitana, 'inega nuanuagu taudi nawale ge ida vaqi luaqiaqediedi be 'idewani ina toatoa.<sup>27</sup> Ta tua 'eguma vaqivaqiu 'inega moqaneu ge una nogedi, ta wese 'idewani 'eguma nawale ge uda vaqi, 'inega vaqi weaqina ge una nuanua.<sup>28</sup> Ta 'eguma nuanuau be una vaqi 'inega Yaubada eu nuanua wese na'awahaqiaqiea. Ta wese 'idewani 'eguma iahaba taha nuanuana navaqi, e 'inega Yaubada ena nuanua wese 'idewani na'awahaqiaqiea. Ta vonahaqiaqi, vaqivaqidi vaqi ana vitayavo ilobelobedi, 'inega nuanuagu omi'a vita diavona ge wese ona lobedi fole ina kafimi.

<sup>29</sup>Taigwavo be novugwavo, egu ve'itayavo adi alamani ba'e: Tuta ni'a vekusakusa wawasai. 'Inega omi'a vaqivaqimi tuta ba'itagana 'inega emi vaqi ge wese na'etobodemi Yaubada ena fewa weaqina.<sup>30</sup> Ta omi'a tonuavita, ami vita ge wese na'etobodemi emi vetafe'wa Yaubada weaqina. Ta omi'a toqaiawa, emi qaiawa 'inega ge wese Yaubada ena fewa ona nuafania. Ta omi'a tovekaikaiwabu, emi kulufa qiduana ge ina vesitaqomi be Yaubada ena nuanua ona nuafania.<sup>31</sup><sup>n</sup> Ta wese omi'a bwa'obwa'o ana yaniavo tuta qabuna ovefewedie, ge daluaqiaqiem 'eguma yani diavona nuami ina 'ewei, mana bwa'obwa'o ba'e be wese yani qabuna 'inaya i'eno'eno tuta goyona ina awala.<sup>32</sup> Egu nuanua ba'e: Ge ona nuanua qiduana emi toa bwa'obwa'o ba'e 'inaya weaqina. Kana nuaia taha 'oloto ge vaqivaqina weaqina, tauna ena nuanua qabuna a'ua'uya eda Kaiwabu ena fewa weaqina, ta wese nuanua ma'oda 'inega ena Kaiwabu nagiveqaiawea.<sup>33</sup> Ta taha 'oloto vaqivaqina tauna bwa'obwa'o ana yaniavo weaqidi nuanua qiduana, ta wese nuanua qiduana ma'oda 'inega moqanena nagiveqaiawedi.<sup>34</sup> 'Inega 'oloto~nana ena nuanuayavo yani magilafudi 'idia a'ua'udi, eda Kaiwabu ana giveqaiawa weaqina, ta wese moqanena adi giveqaiawa weaqina. 'Inega ge ana fata navetafe'wa waiwai Keliso weaqina. Ta wese 'idewani vavine ge vaqivaqina nage iahabana tauna ana fata tuta qabuna nanuanua eda Kaiwabu ena fewa weaqina. Tauna nanuanua ma'oda 'inega niboanina be wese giwalina nahawafeledi eda Kaiwabu 'inaya. Ta vavine vaqivaqidi taudi tuta qabuna edi nuanua ia'ua'uya bwa'obwa'o ana yaniavo 'idia, ta wese ma'oda 'inega moqanedie ina giveqaiawei.

<sup>35</sup>Ba'e ve'ita diavona ge eda vonavonayedie ami 'etoboda weaqina, ta 'esi nuanuagu ena iulemi be yaqisa ge ona tauya gei. Nuanuagu emi tuta ge ona awafelei yani kavokavovo 'idia, ta 'esi yawaimi qabuna ona awafeleia eda Kaiwabu ena fewa weaqina.<sup>36</sup> 'Eguma 'oloto taha nuanuana ana gabuinoqa navaqia, mana iahaba~nana vaqi ana tuta mo'ita nanogeia, ta wese 'oloto~nana ge ana fata 'wafi ena nuanua taunega naluvinei. E

<sup>n</sup> 7:31 1Ion 2:17

'inega luaqiaqiea be maega ina vaqi. Ba'e 'inega 'oloto~nana ge taha wese luveifana naviaqi. <sup>37</sup>Ta 'eguma taha 'oloto ena nuanua 'inega ge nuana ana gabuinoqa maega ina vaqi, ta wese 'wafi ena nuanua ana fata naluvinea, e 'inega tauna wese ena nuanua 'inega yani aqiaqina viaqia. <sup>38</sup>Egu vona ana alamani ba'e: Aqiaqina 'eguma taha 'oloto ana gabuinoqa navaqia. Ta aqiaqi otaqina 'eguma taha 'oloto nuanuana ana 'aidega natoatoa.

<sup>39</sup>° Vavine ma moqanedi itoatoa kavona yoqoyoonidi, 'inega ge ana fata ina nogei mana nawale moqanedi mayawaina toatoa. Ta 'eguma moqanedi yawaina nagumwala 'inega vavine~dina kavona yavuyavuidi ta adi fata taudi edi nuuenuega ina vaqi ukamana mali 'oloto maega. Ta luaqiaqiedi be Keliso ana tovetumaqana taha maega ina vaqi.

<sup>40</sup>Vonahaqiaqi, vaqi yani 'ebeqaiawa, ta yanuaia vavine~dina nawale me edi qiaiawa qiduana ina toatoa 'eguma ge ina vaqi 'evivi. Ta yanuaia ya'a wese Yaubada Niboanina 'inega yaveve'ita 'imia.

### Ve'ita yubai vei'odi ivecubayedi tokwalui 'idia weaqina

**8** <sup>1</sup>¶ Taigwavo be novugwavo, emi vetala'ai yubai vei'odi ivecubayedi tokwalui 'idia weaqina ba'e yavonavona 'eviviemi. Omi'a ovonaya, "Qabuda me eda alamani." Ta yavona aqiaqiem, alamani 'inega taumiega ogigivaneyemi, ta 'esi veiyoluba 'inega kana vewaiwai. <sup>2</sup>¶ Vonahaqiaqi, 'eguma taha toga 'imiega taunega navonaya, "Ya'a yani qabuna weaqidi yahalamani aqiaqiedi!" 'Inega yavonemi tomotau~nana ge taha yani diavona weaqidi dahalamani aqiaqiei. <sup>3</sup>Ta 'esi 'eguma taha toga Yaubada naveyolubea, e 'inega Yaubada tomotau~nana alamani aqiaqiea.

<sup>4</sup>¶ 'Inega egu ve'ita yubai ivecubayedi tokwalui 'idia weaqina ona noqolia. Nage ana fata yubai~nana kana 'aini nage gebu? 'Inega yavonemi ita'a qabuda ni'a kahalamani aqiaqiea Yaubada ana 'aidega otaqa toatoa, ta wese kahalamania tokwalui taudi 'ebeiwa'odu

kavokavovo. <sup>5</sup>Vaidi tomotau ivonaya be yaubada 'eala be wese kaiwabu 'eala bwa'obwa'oya be mahalaya ida toatoa. Vonahaqiaqi, tomotau diavona Yaubada otaqa ge ida vetumaqanea 'inega edi 'ebeiwa'odu 'eala. <sup>6</sup>¶ Ta ita'a ni'a kahalamani aqiaqiea Yaubada ana 'aidega otaqa toatoa.

Tauna Tamada, ta ena 'iva'ava'ata 'inega kuyavata qabudi i'ifoqe. Ta wese ita'a tomotau qabuda 'iva'ava'aida tauna weaqina 'inega ena nuanua kana viaqia. Ta wese eda Kaiwabu ana 'aidega otaqa toatoa, tauna Ieisu Keliso. Ta Keliso~nana 'inega Yaubada kuyavata qabuna 'iva'ava'aidi, ta wese ita'a tomotau Keliso~nana 'inega yawaida ka'eweia.

<sup>7</sup>Ta ba'e yani diavona weaqina tovetumaqana vaidi nuadi nawale ge da'eqa'ui, 'inega ivenuana magilafu edi 'ai weaqina. Taudi lova

<sup>°</sup> 7:39 Lom 7:2-3   <sup>¶</sup> 8:1 Via 15:29   <sup>¶</sup> 8:2 Gal 6:3   <sup>¶</sup> 8:4 Gal 4:8; Luve 4:39; 6:4

<sup>¶</sup> 8:6 Efe 4:5,6

'inaya edi tokwalui 'idia ihiwaiwa'odu, ta wese yubai ivevegubayedi 'idia. 'Inega ba'itagana 'eguma yubai vei'odi i'ai'ai adi lutonova kavona tokwalui taha iawahawatuboya, mana lova edi ilivu 'idewana. 'Inega ivenuana magilafu vei'o~nana ana 'ai weaqina 'eguma yani aqiaqina Yaubada matanaya, nage yani luveifana. Ta adi lutonova kavona ida 'wamomo 'idewani. <sup>8</sup> Vonahaqiaqi, ge ana fata be kana vanaqa Yaubada di'wenaya eda 'ai 'abwaga be yubai vei'odi 'idiega. Mana Yaubada ge wese na'awahaqiaqieda eda 'ai 'inega, ta 'esi eda vetumaqana 'inega. 'Inega ge yani qiduana 'eguma yubai vei'odi ka'ai'ainidi nage kana nogedi. <sup>9<sup>t</sup></sup> Ni'a oalamania ge taha 'etoboda da'eno'eno emi 'ai weaqina. Ta 'esi omi'a taumi emi nuenuega yani taha taha ami fata ona 'ainidi. Ta yani qiduana ba'e ona noqolia, emi 'ai~nana 'inaya taumiega ona 'itamaki aqiaqiqi be yaqisa ge taha toga ena vetumaqana dawalilina 'ai weaqina ona givebe'uyei.

<sup>10</sup> Omi'a emi alamani 'inega ovonaya, "Ita'a ada fata yubai vei'odi kavegubayedi kana 'ainidi." Vonahaqiaqi, ami fata, ta ona 'itamakimi, mana 'eguma ona lugu tokwalui edi vanue 'ebeiw'a'odu 'inaya yubai vei'odi sabi 'ai, ta taha iami ena vetumaqana dawalilina na'itemi 'inega nuana na'ewea vei'o~nana ana 'ai weaqina be na'ainia. Ta tuta~nana 'ai'ai 'inega ana lutonova taunega lutonovia ge aqiaqina. <sup>11<sup>u</sup></sup> Ba'e iami~nana ena ilivu nugwenugweina weaqina Keliso ni'a 'aliga. Ta omi'a emi alamani 'inega iami~nana ogivebe'uya, mana 'ai~nana 'inega kavona ena veiaiana Yaubada maega taunega dabwegei. <sup>12</sup> Ta ba'e ilivu~nana 'inega yani luveifana oviaquia, mana iami~nana ena nuanua ogivevitea. Tauna 'ai~nana 'inega ana lutonova ge aqiaqina. Ba'e 'inega luveifa~nana wese oviaquia Keliso 'inaya, mana iami~nana Keliso ena tomotau. <sup>13<sup>v</sup></sup> Ta ya'a ge nuanuagu tovetumaqana taha ena nuanua ena givevitei egu 'ai 'abwaga nage yubai 'idiega. 'Ebevetalatutula ba'e ona noqolia: Tovetumaqana taha ge nuanuana yubai vei'odi na'ai'ai, mana 'eguma na'ai ana lutonova naluveifa Yaubada matanaya kavona da'wamomo 'idewani. Ta 'eguma na'itegu ya'ai'ai, e 'inega taunega navonaya, "Ya'a wese ena 'ai." Ta tuta~nana na'ai 'ovo, e 'inega ana lutonova naluveifa. 'Inega ya'a lutonova~nana 'iuna. Ta ge wese nuanuagu tovetumaqana taha ena nuanua ena givevitei. 'Inegana 'eguma taha toga egu 'ai yubai vei'ona 'inega ena givebe'uya, e 'inega ge wese taha tuta 'inaya yubai vei'odi ena 'ai'ai.

### Keliso ena tovaletuyanayavo edi ilivu

**9** <sup>1<sup>w</sup></sup> Vaidi tomotau egu fewa ge ida 'awahaqiaqiea. Ta yavona aqiaqiqi, ya'a Ieisu Keliso ena tovaletuyana aqiaqi taha. 'Inega

<sup>t</sup> 8:9 Lom 14:13-15; Gal 5:13    <sup>u</sup> 8:11 Lom 14:15,20    <sup>v</sup> 8:13 Lom 14:21    <sup>w</sup> 9:1 Via 22:17-18; 26:16; 1Kol 15:8-9

ge taha toga ana fata naluvinegu, ta 'esi Keliso ana 'aidega. Ya'a eda Kaiwabu taugu mataguyega ya'itea, ta tauna weaqina yavevetafe'wa waiwai. Ta egu fewa vuaqina omi'a, mana fewa~nana 'inega ni'a Ieisu ovetumaqanea, waisa? <sup>2x</sup> 'Inega omi'a ona alamani aqiaqiea ya'a Keliso vetunegu yawai 'imia ena tovaletuyana 'idewani. Egu vona ba'e 'iuna, mana egu lugaihi 'inega ni'a oluvetuba Keliso maega.

<sup>3</sup>Ta ana 'ita vaidi to'ekalesia nawale ivenuana magilafu egu fewa be wese egu luvine weaqina, 'inega ba'e 'idewani yavonavona 'aika 'imia: <sup>4y</sup> Banaba be wese ya'a magilafuma Yaubada ena tofewayavo, 'inega luaqiaqiema be ama 'abwaga ta wese ama go'ilila ana lobedi omi'a tovetumaqana 'imiega, waisa? <sup>5</sup>Eda Kaiwabu ena tovaletuyanayavo ma moqanediavo taudi wese tovetumaqana be, eda Kaiwabu tainavo ma moqanediavo taudi wese tovetumaqana ta wese Fita ma moqanena qabudi iluvivila dadana di'we taha taha 'idia Ieisu Valena weaqina. 'Inega ona nuaia, nage ima'a ge daluaqiaqiema be edi ilivu ana 'abibodei be moqanemavo maega ana luvivila di'we taha taha 'idia? Vonahaqiaqi, ima'a wese ama luaqiaqi! <sup>6</sup>Tovaletuyana qabudi adi iula ilobelobedi tovetumaqana 'idiega. 'Inega ona nuaia, nage ya'a be wese Banaba ama iula taumega ana lobeia? Gebu'e otaqa! Ima'a wese luaqiaqiema be iula ana lobeia omi'a tovetumaqana 'imiega.

<sup>7</sup>Ebevetalatutula ba'e ona 'itedi: Toluaviayavo adi 'abwaga be wese adi kaleko ge taudiega edi mane 'inega ida gimwagimwanedi, ta 'esi tuta qabuna gabemani edi 'ivenonoqa 'inega kulufa diavona i'ewe'ewed. Ta wese tovaoqa luaqiaqiea be taunega ena vaoqa 'inega ana 'abwaga na'ai. Ta wese 'idewani yubai adi to'itamaki luaqiaqiedi be yubai diavona ina madu'ainidi. <sup>8</sup>Egu vona ba'e ge ya'a egu nuanua 'inega eda vonavonayed, ta 'esi Yaubada ena Buki wese ba'e yani~nana weaqina vonavona, <sup>9z</sup> mana lova Mosese 'wayavia vonaya, "Eguma bulumakau 'alabwatana iuiuleu witi ana fewa 'inaya, e 'inega 'awana ge una yoqonia ta 'esi luaqiaqieu be vaina witi vuaqina una awafelea 'inaya be na'ainidi." Ta omi'a ona nuaia, nage Yaubada bulumakau adi 'aidega weaqidi nuanua? <sup>10a</sup> Ana 'ita gebu, Yaubada ena vona ba'e 'inega wese ima'a ena tofewayavo weaqima vonavona. Tovaoqa ta wese dawana ana to'itamaki ifewafewa, mana inuaia nawale bolimana ana tutu 'inaya adi 'abwaga aqiaqina ina lobeia.

<sup>11b</sup> Ta ima'a Yaubada ena tofewayavo wese 'idewani ena vona a'wadidi niboanimi 'idia, 'inega luaqiaqiemi be ona iula 'eviviema, waisa? <sup>12c</sup> Emi tove'itayavo adi iula aqiaqina tutu qabuna ilobelobedi 'imiega. Ta ima'a amaduwai 'imia ta Ieisu Valena alugaihiea 'imia, 'inega luaqiaqiemi be

<sup>x</sup> 9:2 2Kol 3:2-3    <sup>y</sup> 9:4 Lk 10:8    <sup>z</sup> 9:9 Luve 25:4; 1Tim 5:18    <sup>a</sup> 9:10 2Tim 2:6

<sup>b</sup> 9:11 Lom 15:27    <sup>c</sup> 9:12 Via 20:34; 2Kol 11:9

iula qidua va'inena oda neima, waisa? Vonahaqiaqi, luaqiaqiema be ama fata yani qabuna ada 'ewedi 'imiega. Ta ima'a ge taha tuta ama 'abwaga weaqina ada veidaida dadana 'imia. Ta 'esi ima'a vita qabudi abibitaqodi, mana ge nuanuama tomotau ina vonaya, "Faulo ma enavo Iesu Valena ilulgaihiea edi vegedi 'abwaga sabi 'ai weaqina ta wese kulufa ana 'ewa weaqina, 'inega edi lugaihi~nana Keliso weaqina kana nogea."

<sup>d</sup> 13<sup>d</sup> Ni'a oalamani aqiaqiea taudi Yaubada ena Vanue Gwala 'inaya ifewafewa adi 'abwaga i'ewe'ewea vanue~nana 'inega, mana 'abwaga diavona tomotau imimiedi ia'ua'uluguyedi sabi veguba ta 'inega dibuna i'ai'ai. Ta wese 'idewani toveguba yubai ivevegubayedi 'ebeveguba 'inaya luaqiaqiedi be yubai diavona 'idiega adi fata dibuna ina 'ainidi.

<sup>e</sup> 14<sup>e</sup> Ta wese 'idewani eda Kaiwabu ena luvine 'inega Iesu Valena ana tolugaihieavo luaqiaqiedi be Vale~nana ana tovetumaqanayavo tolugaihi diavona ina iuledi yani taha taha 'idiega, mana vuaqina aqiaqina ilobelobe Vale~nana 'inega. <sup>f</sup> 15 Vonahaqiaqi, Kaiwabu ena luvine 'inega luaqiaqieg be yani qabuna eda 'ewedi 'imiega, ta ge taha tuta luvine~nana eda vefewea egu toa weaqina. Ta wese egu leta ba'e 'inega ge nuanugu omi'a ba'itaganegu fewa 'imia weaqina ona ve'iegu kulufa taha taha 'idiega. Ya'a tuta qabuna yalulugaihi 'imia, ta ge taha yani eda 'ewei 'imiega nage oda vemaisigu, waisa? Egu ilivu ba'ena weaqina tauguyega yagivaneyegu. 'Inega 'eguma ena 'aliga e ba'e yani goyona 'iguya, ta 'esi yani qiduana 'iguya ge taha toga na'etobodegu egu vonavane 'iuna weaqina. <sup>g</sup> 16<sup>f</sup> Yaubada ena venua'ivina 'inega Iesu Valena yalulugaihiea, 'inega ge agu fata be ya'a taugu ena givaneyegu ba'e fewa~nana weaqina. Mana eda Kaiwabu taunega vonegu fewa~nana ena viaqia, 'inega ge agu fata be fewa~nana ena nogei. Ta vonahaqiaqi, luvematasabu qiduana ena lobe 'eguma Vale~nana ge wese ena lugaihie tomotau 'idia.

<sup>h</sup> 17 Ta 'eguma taugu egu nuenuega Vale~nana eda lugaihiea tomotau 'idia, e 'inega luaqiaqieg be ve'ia eda lobe. Ta 'esi Yaubada venua'ivinegu be vetumaqanegu ena nuanua ena viaqia. 'Inega ge wese agu fata be fewa~nana ena nogei. <sup>i</sup> 18 Nage onuanua agu ve'ia weaqina, waisa? 'Inega agu ve'ia weaqina ena vemamatagilafuyemi: Vonahaqiaqi, ya'a tolugaihi taha, 'inega luaqiaqieg be yani qabuna agu fata eda 'ewedi lugaihi~nana 'inega, ta tua ge wese ve'ia 'idewani 'abwaga nage mane weaqina eda nuanua. Ta 'esi Vale~nana ana lugaihi 'inega yaqaiqaiawa qiduana, ta qaiawa~nana tauna ta'iwa agu ve'ia.

<sup>j</sup> 19 Ya'a egu fewa weaqina ge taha ve'ia eda 'ewei 'imiega. 'Inega ge taha toga ana fata naluvinegu, ta 'esi tauguyega yahawafelegu yavetofewa kavovo tomotau qabudi 'idia sabi 'ebe'ewadi ina mai Keliso 'inaya adi

<sup>d</sup> 9:13 Luve 18:1-3    <sup>e</sup> 9:14 Md 10:10; Gal 6:6    <sup>f</sup> 9:16 Iel 20:9

'etoyavua weaqina. <sup>20g</sup> 'Inega tuta~nana me Diu maega atoatoa, e 'inega ya'a kavona Diu 'edewani, ta edi ilivu ya'abi'abibodea be yaqisa ana fata ena 'ebe'ewedi Keliso 'inaya. Ta tuta~nana Mosesen ena luvine ana tomatayagayavo maega atoatoa, e 'inega edi ilivuyega yaveilivu. Ta edi luvineavo ge daluvinegu, mana ya'a Keliso ena tofewa taha. Ta tua edi ilivu ya'abi'abibodedi be yaqisa ana fata ena 'ebe'ewedi ina mai Keliso 'inaya. <sup>21</sup> Ta wese tuta~nana taudi ge me Diu maega atoatoa edi ilivu 'inega yaveilivu aqiaqi 'inega nuadi ya'ewe. Taudi Mosesen ena luvine ge ida matayagedi. Ta veilivu~nana 'inega egu vona ivetumaqanea, e ba'e 'inega yamiedi Keliso 'inaya. Ta ya'a Yaubada ena luvineavo ge eda veyani kavokavovoyedi, mana ya'a Keliso ena luvine ana to'abiboda.

<sup>22h</sup> Ta wese tuta~nana todawalili maega atoatoa 'inega ya'a wese yavetodawalili. Ta egu veilivu~nana 'inega egu vona ivetumaqanedi, e ba'e 'inega wese yamiedi Keliso 'inaya. Vonahaqiaqi, qabu taha taha ge eda givenu'wedi edi ilivuyavo weaqina, ta 'esi yaveiana aqiaqediedi, 'inega ana fata tomotau qabudi ena miedi Keliso 'inaya adi 'etoyavua weaqina. <sup>23</sup> Ba'e yani diavona yaviaviaqidi Iesu Valena Aqiaqina ana giveqidua weaqina be yaqisa tovetumaqana qabumi maega Yaubada ena veyoluba kana lobedi.

<sup>24</sup> Ni'a oalamania laha taha taha ma adi luvineavo, 'inega ona nuaia 'eguma qabu taha ina vihila 'inega 'idiega 'aideganamo nanugweta 'inega ve'ia na'ewe, waisa? 'Inega o'a wese ba'e 'idewani una vihila 'aiqa ve'ia~nana sabi 'ewana. <sup>25i</sup> Tolaha qabudi taudiega i'ita'itamakidi laha ana luvine weaqina, 'idewani edi 'ai be, edi 'eno ta wese yani taha taha 'idiega, e 'inega ina vewawai, mana nuanuadi ina nugweta be laha ana ve'ia aqiaqina ina 'ewedi. Ta ve'ia~nana tomotau nimadiega iviaviaquia, 'inega nawale naveyani kavokavovo. Ta ita'a tovetumaqana kavivihila ve'ia 'eno'eno vatayana weaqina. <sup>26j</sup> 'Inega ya'a taugu ge eda vihila kavokavovo, ta 'esi egu masi 'iawaguya ya'itea, 'inega 'eda tunutunuqina 'inega yavivihila ana 'ebelu'ovo weaqina. Kana nuaia tofwaiki aqiaqi weaqina, mana tauna ge dafwaiki kavokavovo, ta 'esi nimana ena inoqa 'aidega 'aidega 'idia nuanuana ana avia navunuqia. Ya'a wese 'idewani tofwaiki~nana, mana ge nuanuagu fewa~nana Yaubada neigu ana masi ena lu'waqiei. <sup>27j</sup> 'Inegana 'wafigu taugu yaluvinea be ya'itamaki aqiaqiea kavona tolaha aqiaqi 'idewani, ta ge eda awafelei yani kavokavovo 'idia. Mana ge yani aqiaqina 'eguma ya'a yalulugaihi tomotau 'idia 'etoyavua ana 'eda weaqina, ta taugu vona diavona ge eda 'abibodedi, 'inega ge taha ve'ia ena lobei.

<sup>g</sup> 9:20 Via 21:20-26    <sup>h</sup> 9:22 2Kol 11:29    <sup>i</sup> 9:25 Fil 3:14; 2Tim 4:7-8; 2:4-5

<sup>j</sup> 9:27 Lom 8:13; 13:14

### Ge kana iwa'odu tokwalui 'idia

**10** <sup>1<sup>k</sup> Taigwavo be novugwavo, ge ona nuafania tola'ai lova 'ifoqe tubudavo me Diu 'idia tuta~nana di'we Itifita inogea ta Moses maega itautauya di'we 'ava'ava 'inaya. 'Inega Yaubada gawata qiduana vetunei webui ve'igwa'uyedi. Ta gawata~nana ena vanugweta 'inega itautauya. Ta wese Yaubada ena waiwaiuga Mwade'wa Bweabwealina a'usi'iea 'inega kavona 'eda 'ifoqe nuaninaya ta qabudi ayahayanega ivaukamana. <sup>2</sup> Ta vaukamana~nana 'inaya gawata be Mwade'wa Bweabwealina 'inega ibabitaiso edi veto'abiboda Moses 'inaya weaqina. <sup>3<sup>l</sup> Ta wese me Diu tuta 'aidega 'aidega adi 'abwaga ana wawa "manā" i'ewe'ewea Yaubada ena waiwaiuga ta i'ai'ainia. <sup>4<sup>m</sup> Ta wese 'idewani tuta 'aidega 'aidega 'idia adi go'ilā 'aidegana 'inega inumanuma. Go'ilā~nana Yaubada ena waiwaiuga dabo 'inega 'ifoqe matadia, ta dabo~nana tuta qabuna tauidi maega tauya~nana 'inaya. Ta dabo~nana tauna Keliso. <sup>5<sup>n</sup> Ta tubudavo diavona edi viaqayavo 'idiega Yaubada ge daqaiaawa weaqidi, 'inega 'idiega 'eala i'aliga di'we 'ava'avaya.</sup></sup></sup></sup>

<sup>6-7<sup>o</sup> Ta ba'e yani diavona ive'ebe'ita 'idaya be yaqisa ita'a edi ilivu luveifana ge kana 'abibodedi. Vaidi 'idiega edi tokwalui iawatubodi, ta ilivu~nana ge kana viaqi, mana Buki Nugwenugweina vonaya, "Tomotau diavona itoabui i'ai'ai ta inumanuma, 'inega iya'itoto ta iouou edi tokwaluiavo matadia." <sup>8<sup>p</sup> Ta wese ge kana velamo'eno kavokavovo 'idewani tubudavo vaidi iviaquia, mana ilivu~nana weaqina tomotau adi yau tuweniti teli tausani (23,000) i'aliga 'aubena 'aidegana 'inaya. <sup>9<sup>q</sup> Ta wese eda Kaiwabu ge kana sitonovi 'idewani tubudavo vaidi iviaquia edi ilivu luveifana 'inega. Vona aqiaqi, luveifa~nana iviaqidi 'inega mwata i'ifoqe i'utedi 'inega i'elu'aliga. <sup>10<sup>r</sup> Ta wese ge kana vetalabudabuda 'idewani tubudavo vaidi iviaquia, mana edi vetalabudabuda weaqina Yaubada luve'aliga ana tovale'ewa vetunei webui 'idia ta luve'aligidi. <sup>11</sup> Tubudavo luvematasabu waiwaina ilobedi edi ilivu weaqina, ta ba'e yani diavona 'waya'wayavina Buki Nugwenugweina 'inaya ivonavona waiwai ita'a lagata vauvaua 'idaya, mana bwa'obwa'o ba'enā ena tutu 'ebel'ovo ni'a vadi'weda.</sup></sup></sup></sup>

<sup>12</sup> 'Inega 'eguma taha toga taunega weaqina nanuaia navonaya, "Ya'a me egū vetumaqana waiwaina yatovolo'i'ital!" E 'inega taunega na'itamaki aqiaqiea fole luveifa diavona 'idiega nabe'u. <sup>13</sup> Ta tuta~nana sitonova taha taha una lobedi ta nuanuau yani luveifana una viaquia, e 'inega una alamani aqiaqiea ge o'a au 'aidega 'iuya da'ifo'ifoqe, ta 'esi

<sup>k</sup> 10:1 'Ifo 13:21-22; 14:22-29    <sup>l</sup> 10:3 'Ifo 16:35    <sup>m</sup> 10:4 'Ifo 17:6; Naba 20:11

<sup>n</sup> 10:5 Naba 14:29-30    <sup>o</sup> 10:6-7 1Kol 10:11; Naba 11:4,34; 'Ifo 32:6    <sup>p</sup> 10:8 Naba 25:1-9

<sup>q</sup> 10:9 Naba 21:5-6    <sup>r</sup> 10:10 Naba 16:41-49

tovetumaqana qabudi sitonova diavona wese ilobelobedi. Yaubada lova vona fofofolayeda ge wese nanogeda, ta ba'e vona fofofola~nana ge wese nabwegei. 'Inega ge wese nahawafeleu sitonova waiwai va'inena 'inaya, ta 'esi au 'etofwafwa 'inaya. Ta wese tuta~nana sitonova ulobelobedi 'inega Yaubada naiuleu be dena ana 'eda nave'iteu 'inega sitonova~nana 'inega una dena, ta ge wese una be'u.

<sup>14</sup> 'Inega egwavo, tokwalui adi iwa'odu ona nogea. <sup>15</sup> Yavonavona 'imia kavona omi'a toalamani aqiaqi, 'inega omi'a ami fata egu vona ba'e ena vonayedti ta ona a'uvividividinidi 'eguma vonahaqiaqi nage gebu. <sup>16<sup>s</sup> Ta ona nuaia, tuta~nana kavava'auta eda Kaiwabu ena 'Ai weaqina 'inega 'abwaga~nana ana tovewila'a nugweta vedi ma 'oinena na'ewei navona veyolubei Yaubada 'inaya, ta 'abiboda kana numea. 'Inega kavona Ieisu sulalina kada numei eda 'ebe'ita ena 'aliga weaqina, ta sulala~nana 'inega kave'aidega maega. Ta wese 'idewani beledi, mana beledi~nana kana gitomwei kana 'ainia, e 'inega kavona Keliso 'wafina ni'a kada 'aini, 'inega wese maega kave'aidega. <sup>17<sup>t</sup> Ita'a qabuda beledi 'aidega~nana 'inega ka'ai'ai, ta ba'e beledi~nana 'inega qabuda kave'wafi 'aidega. <sup>18<sup>u</sup> Ta kana nuaia me Isileli edi ilivu weaqina, mana taudi edi yubai ivesgabayedi ta i'ainidi, ta 'ai~nana 'inega qabudi ive'aidega.</sup></sup></sup>

<sup>19<sup>v</sup> Egu vona~nana ba'e 'iuna ena givesimatalia 'imia. Ya'a ge eda vonevonemi tomotau edi tokwalui edi waiwai kavona Yaubada otaqa ena waiwai 'idewani. Ta wese ge eda vonevonemi tomotau edi veguba tokwalui 'idia yani aqiaqina nage yani qiduana. <sup>20<sup>w</sup> Gebu'e otaqa! Ta 'esi yavonevonemi edi vegubayavo iviaviaqidi niboana lufeifadi 'idia weaqina, ta gebu Yaubada otaqa 'inaya. 'Inega ge nuanuagu taha toga 'imiega taudi maega ona luvetuba ta ona veiaiana. <sup>21<sup>x</sup> Mana ge ana fata eda Kaiwabu ana vediega ona numa, ta wese Seitani enavo adi vediega ona numa. Wese 'idewani ge ana fata 'abwaga kana 'ai eda Kaiwabu ena teboloyega, ta wese Seitani enavo edi teboloyega. <sup>22<sup>y</sup> Nage ita'a nuanuada eda Kaiwabu kana vediavilevilea? Nage ita'a kana vewaiwai va'ine, waisa? Yavonevonemi, gebu'e otaqa!</sup></sup></sup></sup>

### Edavo weaqidi kana nuanua ta ge taudamo weaqida

<sup>23<sup>z</sup> Nage vaina 'imiega ovonaya, "Ieisu ena viaqayavo 'idiega yavuyavuigu yatoatoa me Diu edi luvine be wese edi ilivu 'idiega, 'inega luaqiaqiegua be yani qabuna agu fata ena viaqidi." Vonahaqiaqi, au fata, ta viaqa diavona vaina ge wese ina ve'ebeiula 'iuya. Ta wese vaina 'imiega ovonaya, "Agu fata yani taha taha ena viaqidi." Vonahaqiaqi, au fata, ta</sup>

<sup>s</sup> 10:16 Md 26:26-28    <sup>t</sup> 10:17 Lom 12:5    <sup>u</sup> 10:18 Luvi 7:6    <sup>v</sup> 10:19 1Kol 8:4

<sup>w</sup> 10:20 Luve 32:17; Ve 9:20    <sup>x</sup> 10:21 2Kol 6:15-16    <sup>y</sup> 10:22 Luve 32:21

<sup>z</sup> 10:23 1Kol 6:12

vaina yani ge wese ina iuleu. <sup>24</sup><sup>a</sup> Ge tau'umo eu 'ebeqaiawa weaqina una nuanua, ta 'esi luaqiaqieu be una nuanua ma'oda 'inega emwavo wese una giveqaiawedi.

<sup>25</sup>Ta omi'a ba'e 'idewani ona viaqia: 'Eguma yubai vei'odi adi 'ebeginwane 'inega una gimwanea sabi 'ai, e 'inega weaqina ge tau'u una vetala'aeiu una vonaya, "Ma'inega yubai~nana mai, nage tokwalui adi veguba weaqina, nage gebu?" Mana 'eguma tau'u ba'e yani~nana weaqina una vetala'aeiu 'inega tau'u wese una nuaia nage yani aqiaqina uviaviaqia nage yani luveifana. <sup>26</sup><sup>b</sup> Ta 'esi au fata una 'ainia, mana Buki Nugwenugweina vonaya, "Eda Kaiwabu bwa'obwa'o 'iva'ava'aia, ta wese yani diavona i'eno'eno bwa'obwa'o debanaya eda Kaiwabu 'inega imai."

<sup>27</sup>Eguma taha toga ge davetumaqana Keliso 'inaya ta na'ebe'eweua ena vanuea 'ai weaqina, e 'inega ena gaba una 'awahaqiaqiea. 'Inega 'eguma toyani matauya naha'uya ge weaqina una vetala'ai ta 'esi una 'ainia. Ta ge wese tau'u una nuanua una vonaya, "Nage yani luveifana yaviaqia ba'e 'ai~nana 'inega?" <sup>28</sup><sup>c</sup> Ta 'eguma taha toga 'ai~nana 'inaya navematamagilafuyeu navonaya, "Ba'e yubai~nana ni'a ivesgabayea tokwalui 'idia." E 'inega yubai~nana ge una 'aini ta 'esi una nogea, mana 'eguma tomotau~nana nahalamania o'a taha tovetumaqana ta tua yubai~nana u'ainia, e 'inega tauna una givenuenuea. <sup>29</sup>Unoqolia, ge wese eda voneu 'ai~nana 'inega yani luveifana uda viaqi, ta 'esi tovetumamatagilafu~nana nanuaia o'a ni'a luveifana uviaqia.

Nage taha toga 'imiega una vonaya, "Ge taha toga daluaqiaqiei be ena nuanua 'ai weaqina naluvinegu egu viaqayavo 'idia, be 'inega vaina ena nogedi ta vaina ena 'awahaqiaqiedi, mana ya'a taugu agu fata be ena venua'ivina toyani luaqiaqiegus nage toyani ge daluaqiaqiegus. <sup>30</sup><sup>d</sup> Ta 'eguma Yaubada 'inaya agu 'abwaga be yubai weaqina yalulukaiwa, e 'inega tola'ai weaqina vaina tomotau ina 'aivegilegu?" <sup>31</sup><sup>e</sup> 'Inega ya'a Faulo yavona aqiaqiem, tola'ai ka'ai'aini ta tola'ai kanumenumaea, ta wese yani qabudi kaviaviaqidi, e kana viaqidi Yaubada sabi awatubona. <sup>32</sup><sup>f</sup> 'Inega me Diu be taudi ge me Diu ta wese Yaubada ana tovetumaqanayavo qabudi ge ona givenuavitedi emi viaqayavo be wese emi ilivuyavo 'idiega. <sup>33</sup><sup>g</sup> Ta wese ya'a 'idewani nuanuagu tomotau qabudi ena giveqaiawedi egu viaqayavo qabudi 'idiega. 'Inegana ge eda nuanua qiduana taugu egu aqiaqi weaqina, ta 'esi tomotau qabudi edi veaqiaqi weaqina yanuanua, be yaqisa 'etoyavua ina lobeia Yaubada 'inega.

<sup>a</sup> 10:24 Lom 15:1-2    <sup>b</sup> 10:26 Same 24:1    <sup>c</sup> 10:28 1Kol 8:7    <sup>d</sup> 10:30 1Tim 4:4

<sup>e</sup> 10:31 Kol 3:17    <sup>f</sup> 10:32 Lom 14:13    <sup>g</sup> 10:33 1Kol 9:20-22

### Tafwalolo ana ve'eda aqiaqi

**11** <sup>1<sup>h</sup></sup> Omi'a egu ilivu ona vetutumedi, 'idewani ya'a Keliso ena ilivu yavevetutumedi.

<sup>2</sup>Omi'a me Kolinita yaqaiawa weaqimi, mana omi'a ge oda nuafanigu, ta egu ve'ita ita'a tovetumamaqana eda toa weaqina lova yave'ita ukamaned i'mia omamatamatayagedi.

<sup>3<sup>i</sup></sup> Ta taha yani weaqina nuanuagu ona nua'eqa'uya, e ba'e: Keliso tauna 'oloto adi toludebana. Ta vivine adi toludebana 'oloto. Ta Yaubada tauna Keliso ana toludebana. <sup>4</sup>Omo'e 'inega 'oloto ge wese daluaqiaqiedi 'eguma debadi ina umedi tuta~nana ivevenoqi nage Yaubada ena vona isimasimana 'ifoqeye. Mana 'eguma debadi ina umedi 'inega ge taha 'amayaba ida ve'itayei Keliso 'inaya, tauna adi toludebana.

<sup>5</sup>Ta vivine 'idia dumadumana. Taudi tuta qabuna debadi ma umana tuta~nana ivevenoqi nage Yaubada ena vona isimasimana 'ifoqeye. Mana 'eguma debadi ge ana umamo, e 'inega ge taha 'amayaba ina ve'itayei moqanediavo 'idia, 'inega adi 'ita ge aqiaqina, ta 'esi kavona taha vavine debana kwelikwelina. <sup>6</sup>Vonahaqiaqi, 'eguma taha vavine ge nuanuadi debadi ina umei, e 'inega luaqiaqiedi be debadi qabuna ina da'a yavulea. Mana vivine 'idia debadi ana da'a yavula nage kweli vekawawa yani 'ebeiniyauyau, e 'inegana debadi ina umea. <sup>7<sup>j</sup></sup> Ta 'oloto debadi ge ina umedi tafwalolo ana tuta 'inaya, mana Yaubada 'oloto viaqia ana 'ita tauna 'idewani, ta wese 'oloto viaqia tauna ena ilivu 'idewani. Vonahaqiaqi, Yaubada nuanuana 'amayaba nalobe a 'oloto adi 'ita 'inega. Ta 'esi vivine debadi ina umedi, mana taudi edi awafela moqanediavo edi luvine 'ayanaya ina ve'itayea ba'e ilivu~nana 'inega. <sup>8<sup>k</sup></sup> Egu vona ba'e 'iuna, mana Yaubada 'oloto ge daviaqi vavine 'inega, ta 'esi vavine viaqia 'oloto 'inega. <sup>9</sup>Ta wese ge 'oloto daviaqi vavine weaqina, ta 'esi vavine viaqia 'oloto ana iula weaqina. <sup>10</sup>Vonahaqiaqi, Yaubada ena tovale'ewayavo vivine~dina ivevekovedi, 'inega vivine luaqiaqiedi be debadi ina umedi, ta ba'e 'inega taudiega ina ve'itayedi vonigo moqanediavo edi luvine 'ayanaya itoatoa.

<sup>11</sup>Ta ita'a eda toa eda Kaiwabu ena qabu gamonaya vivine taudi yani qiduana 'oloto weaqida, ta wese 'idewani 'oloto yani qiduana vivine weaqidi, mana kaveveiuiula eda toa 'inaya. <sup>12</sup>Vona ba'e vonahaqiaqi, mana vavine Ibi 'oloto 'inega 'ifoqe, ta 'abiboda 'oloto qabudi vivine 'idiega ivi'oi, ta yani qabuna Yaubada ena 'iva'ava'ata 'inega i'ifoqe.

<sup>13</sup>'Inega tau'u una nuaia, nage vivine adi luaqiaqi be ina venoqi Yaubada 'inaya tomotau matadia ta debadi ge adi umamo? Gebu adi fata! <sup>14-15</sup>Nage ge oda alamania vivine debadi kuena adi 'ita aqiaqina

<sup>h</sup> 11:1 1Kol 4:16   <sup>i</sup> 11:3 Nug 3:16; Efe 5:23   <sup>j</sup> 11:7 Nug 1:26-27   <sup>k</sup> 11:8-9 Nug 2:18-23

weaqina. Mana Yaubada debadi kuena neidi adi kia ana uma weaqina. Ta ni'a kahalamani aqiaqiea 'oloto ge adi luaqiaqi be debadi navekue, mana ba'e ilivu~nana 'inega 'oloto Yaubada ena 'iva'ava'ata 'unu iveyani kavokavovoyea.<sup>16</sup> Ta 'eguma taha toga nuanuana nave'ae'aetoga egu ve'ita ba'e yani diavona weaqidi, 'inega ya'a ta wese Yaubada ena 'ekalesiyavo maega avona aqiaqimi: Ba'e 'idewani Yaubada ahawahawatuboya, ta gebu mali ve'eda 'inega.

### Kaiwabu ena 'ai ana luvine

(Madiu 26:26-29; Maki 14:22-25; Luke 22:14-20)

<sup>17</sup>Ta wese ilivu taha weaqina ena vemamatagilafuyemi. Ta ilivu~nana weaqina ge agu fata ena qaiawa weaqimi. Mana tuta~nana ovava'auta tafwalolo weaqina 'inega vita 'ifo'ifoqe nuanimia.<sup>18<sup>l</sup></sup> Valemi yanoqolia, mana vaina tomotau imai ivonegu emi va'autayavo 'idia vetoatoasi'i 'ifo'ifoqe nuanimia. Ta vona diavona weaqimi vaina yavetumaqanedi, ta vaina gebu.<sup>19</sup> Ta vetoatoasi'i~nana weaqina ge nuagu davoqana, mana yahalamania ba'e 'inega kana 'ita aqiaqiedi tomeqabu 'eda tunutunuqina 'inega itautauya, ta tomeqabu gebu.

<sup>20</sup>Vonahaqiaqi, tuta~nana ovava'auta eda Kaiwabu ena 'ai weaqina omi'a ovonaya be 'ai aqiaqina oda viaviaqi, ta gebu. Ta 'esi 'ai~nana 'inaya kavona tomotau 'aidega 'aidega taunega ana 'abwaga da'ai'aini.<sup>21</sup> Mana tuta~nana ovava'auta, 'inega vaina 'imiega ami 'abwaga otaqa omiea o'ai'ai ta gamomi kokoko, ta vaina ma botanimi, ta wese vaina onumanuma qiduana 'inega ovekwavakwava.<sup>22</sup> Ma'oda omi'a? Kavona ge emi vanuemo, waisa? Ba'e ilivu~nana 'inega Yaubada ena tomotauyavo ge oda 'amayabedi, mana taudi lukwalukwadi adi 'abwaga goyon imimiea i'ai'ai, 'inega ogiveiniyauyaunidi. Nage ba'e ilivu~nana weaqina agu fata ena awatubomi? Gebu'e otaqa! Ta 'esi nuanuagu omi'a emi vanueavo 'idia ona 'ai nugweta, ta 'abiboda ona lugu vanue tafwalolo 'inaya Kaiwabu ena 'ai weaqina.

### Eda Kaiwabu ena 'ai ana ve'eda aqiaqi weaqina

<sup>23-24</sup>Lova eda Kaiwabu Ieisu ena 'ai ana 'eda taunega ve'itayea 'iguya, 'inega ya'a wese ni'a yave'itemi. Velovelovani~nana 'inaya tuta goyon be Iudasa eda Kaiwabu Ieisu nasuluvea, ta nugweta Ieisu beledi 'ewei lukaiwa Yaubada 'inaya ta gitomwei ena tovaletuyanayavo matadia ta vonedia, "Ba'e 'wafigu yahawafelea omi'a weaqimi ona 'ainia. Ba'e 'idewani ona viaqa 'aiqa agu 'ebenuave'avina weaqina."<sup>25<sup>m</sup></sup> 'Ai gumwala 'inega wese 'idewani 'oine ma vedina 'ewei vonedi vonaya, "Yaubada ena luvine vauvauna ba'e sulaligu ma vedina 'inega yagigive'ifoqeyea 'imia.

<sup>l</sup> 11:18 1Kol 1:10-12    <sup>m</sup> 11:25 'Ifo 24:6-8; Ibe 8:8-13

Ta 'abo totuta 'inaya wese ona numea, e 'inega ona nuave'avinigu.<sup>26</sup> Ta tuta~nana beledi~nana o'ai'ainia be 'oine~nana onumenumMEA, e 'inega eda Kaiwabu ena 'aliga weaqina osimasimana 'ifoqeyea ana laba na'evivi namai.

<sup>27</sup><sup>n</sup> Ta tomeqabu beledi~nana i'ai'ai kavovoya ta wese 'oine~nana inumanuma kavovoya taudi tomotau diavona eda Kaiwabu ge ida 'amayabea, mana 'wafina be sulalina iveryani kavokavovoyea, 'inega taudi ni'a luveifana iviaqia. <sup>28</sup><sup>o</sup> Inega togama nuanuana eda Kaiwabu ena 'ai ana 'ebenuave'avina na'ainia, e 'inega nugweta taunega giwalina na'ita aqiaqiea. E 'abiboda ana fata beledi~nana na'ainia ta wese 'oine~nana nanumea. <sup>29</sup> Mana 'eguma taha toga Ieisu 'wafina ena 'aliga 'iuna ge nahalamani aqiaqiea ta tua beledi~nana na'ainia be 'oine~nana nanumea, e 'inega tomotau~nana taunega luluvematasabuya. <sup>30</sup> Vonahaqiaqi, ba'e 'inega 'eala 'imiega iverihiqi be idawalili, ta wese vaina yawaidi ni'a gumwala.

<sup>31</sup> Ta eda Kaiwabu ena 'ai ana tutu 'inaya 'eguma nugweta taudega giwalida kana lutonova aqiaqiea, e 'inega ge wese Yaubada naluvematasabuda. <sup>32</sup><sup>o</sup> Ta 'esi ita'a ba'itagana luvine be wese luvematasabu kalobelobeA eda Kaiwabu 'inega, be yaqisa ge luvine waiwaina nawale kana lobei tutu 'ebel'ovoA 'inaya taudi tovegwavu'ai maega. <sup>33</sup> Inega egwavo, tutu~nana ona va'auta eda Kaiwabu ena 'ai weaqina, 'inega emiavo ona ba'eyedI ina mai ta 'abwaga otaqa taudi maega ona 'ai. Ta 'abibodanaya eda Kaiwabu ena 'ai ana 'ebenuave'avina ona 'ainia. <sup>34</sup> Ta 'eguma taha toga nabotana veiveifa ta ge ana fata enavo naba'eba'eyedI vanue tafwalolo 'inaya, e 'inega tauna ena vanuea na'ai nugweta, ta 'abibodanaya nalugu 'ai~nana weaqina enavo maega, fole Yaubada ena luvine nalobei.

Ta nawale ena wai 'imia, 'inega wese vaina yani weaqidi onuanua ena givesimalalidi weaqimi ta ena vebibinemi.

### Ada wil'a Niboana Gwalagwalana ena nei kavovo 'inega

**12** <sup>1</sup>Egwavo, tutu ba'e 'inaya emi vetala'ai Niboana Gwalagwalana ena fewa tomotau 'idaya weaqina ena givesimalalia 'imia, mana nuanuagu nuami na'eqa'uya ba'e yani~nana weaqina. <sup>2</sup><sup>p</sup> Ni'a oalamania lova ma'oda otoatoa 'aiqa tutu~nana Ieisu nawale ge oda vetumaqanea. Ta emi ilivu 'inega taumiega otanya gei ta tubumiavo edi tokwalui ge edi veqaeMo 'idya oiwaiwa'odu. <sup>3</sup><sup>q</sup> 'Inega nuanuagu ma'oda 'inega ona alamani aqiaqiea 'eguma Yaubada Niboanina tomotau edi vona 'inega 'ifo'ifoqe, mana ge taha toga ana fata Ieisu navona ve'alatei 'eguma tauna Niboana Gwalagwalana 'inega vonavona. Ta wese ge taha toga ana fata

<sup>n</sup> 11:27 Ibe 10:29   <sup>o</sup> 11:32 Ibe 12:5-6   <sup>p</sup> 12:2 Aba 2:18-19   <sup>q</sup> 12:3 1Ion 4:2-3

navonaya, "Ieisu tauna egu Kaiwabu" 'eguma Niboana Gwalagwalana ge datoatoa tomotau~nana giwalinaya.

<sup>4<sup>r</sup></sup>

Vonahaqiaqi, wila'a taha taha mali fewa be mali fewa weaqina ka'ewedi, ta wila'a diavona i'ifo'ifoqe mai Niboana Gwalagwalana ana 'aidega 'inega. <sup>5</sup>Ita'a tovetumaqana eda fewa dumadumana be dumadumana 'ekalesia gamonaya, ta qabuda eda Kaiwabu ana 'aidega weaqina kafewafewa. <sup>6</sup>Yaubada mali fewa be mali fewa viaviaqidi 'idega, ta wese Yaubada ana 'aidega fewa diavona 'iudi. <sup>7</sup>Tovetumaqana taha taha ada wila'a 'aidega 'aidega Niboana Gwalagwalana 'inega ka'ewedi ita'a 'ekalesia qabuda ada iula weaqina.

<sup>8</sup>'Inega taha tovetumaqana ana wila'a Niboana 'inega ana fata nuanua simasimatalina nasimanea enavo adi iula weaqina, ta wese taha tomotau ana fata alamani qiduana na'ewea Niboanina 'aidegana 'inega. <sup>9</sup>Taha tomotau ana wila'a vetumaqana qiduana. Ta wese taha tomotau ana wila'a 'inega ana fata tomotau nagiveaqiaqiedi. <sup>10</sup>Taha tomotau ana wila'a 'inega ana fata yani 'ebenuavoqana naviaqidi, ta taha tomotau ana wila'a 'inega ana fata Yaubada ena vona nasimana 'ifoqeyedi. Taha tomotau ana wila'a 'inega ana fata nahalamani aqiaqiea 'eguma taha toga vonavona Yaubada Niboanina ena waiwaiega, nage mali niboana 'inega. E taha tomotau ana wila'a 'inega ana fata navona mali mea be mali mea 'idega, ta taha tomotau ana wila'a 'inega ana fata veqae diavona nagiviledi. <sup>11<sup>s</sup></sup>

Ba'e wila'a diavona Niboana Gwalagwalana 'aidegana 'inega i'ifoqe. Tauna ana 'aidega ena nuenuega vewila'ayedi tomotau taha taha 'idia.

### 'Wafi 'aidegana ta du'unavo 'eala

<sup>12<sup>t</sup></sup>

Tomotau 'wafina du'unavo 'eala wawasai, ta du'u diavona qabudi iluvetuba 'inega ive'wafi 'aidega. Ita'a Yaubada ena tomotauyavo wese 'idewani, mana ita'a tomotau 'aidega 'aidega qabu qidua va'ineda, ta ni'a kaveqabu 'aidega Keliso maega. 'Inega kavona ita'a Keliso 'wafina. <sup>13<sup>u</sup></sup>

Vaina 'idega me Diu, vaina ge me Diu, vaina 'idega tofewa kavovo, ta wese vaina yavuyavuida. Ta qabuda Niboanina 'aidegana 'inega babitaiso ni'a ka'ewea.

<sup>14</sup>Vonahaqiaqi, tomotau 'wafina ge du'u 'aideganamo, ta 'esi du'unavo 'eala. <sup>15</sup>'Eguma taha 'aqe navonaya, "Ya'a ge 'wafi du'una mana ya'a 'aqe ta ge nima." Ta ba'e vona~nana 'inega ge wese 'aqe~nana ana fata taunega davetoasi'iei 'wafi du'unavo 'idega. <sup>16</sup>Ta wese 'idewani 'eguma teniqa taha navonaya, "Ya'a ge 'wafi du'una taha, mana ya'a taniqa ta ge mata." Ta ba'e vona~nana 'inega ge wese ana fata taunega davetoasi'iei 'wafi du'unavo 'idega. <sup>17</sup>Kana nuaia, 'eguma 'wafida mata daisina,

<sup>r</sup> 12:4 Lom 12:6    <sup>s</sup> 12:11 1Kol 7:7    <sup>t</sup> 12:12 1Kol 10:17    <sup>u</sup> 12:13 Gal 3:28

ma'oda 'inega kana noqola 'aika? Ta wese 'idewani 'eguma 'wafida teniqa daisina, ma'oda 'inega kana yaoqa 'aika?

<sup>18</sup> Ta 'esi Yaubada 'wafida viaqidi du'u taha taha 'idiega, ta du'u diavona a'udi tauna ena nuanua 'inega. <sup>19</sup> Kana nuaia, 'eguma du'uda 'aideganamo, 'inega ma'oda navetomotau 'aika? <sup>20</sup> Vonahaqiaqi, du'u 'eala, ta 'wafi 'aidegana. <sup>21</sup> Matada ge ana fata nimada navoneaya, "Ge nuanuagu o'a!" Ta wese 'idewani 'unu'unuda ge ana fata 'aqeda navoneaya, "Ge nuanuagu o'a!"

<sup>22</sup> Vonahaqiaqi, vaina du'uda weaqidi kanuanua kavonaya dawalilidi ta yani kavokavovo. Ta ge 'idewani ona nuanua, mana taudi wese edi fewa yani qiduana 'wafida ana iula weaqina. <sup>23</sup> Du'uda vaina ge nuanuada kana awatubodi, mana kavonaya be taudi ge yani qiduana, ta tua du'u diavona ka'ita'itamaki aqiaqiedi. Ta wese du'uda vaina kaumeumedi, mana taudi weaqina kainiyauyau, 'inega ge nuanuada tomotau ina 'itedi. <sup>24</sup> Ta 'esi du'uda vaina weaqidi ge kada iniyauyau, e 'inega ge kada nuanua weaqidi be kana umedi. Ta Yaubada 'wafida du'unavo luvetubedi, 'inega du'u diavona kanuaidi kavonaya be yani kavokavovo, e taudi wese awatubo be 'itamaki aqiaqi ilobelobe, <sup>25</sup> be yaqisa ge taha vetoatoasi'i na'ifoqe du'u qabudi nuanidia, ta 'esi qabudi edi nuanua 'aidegana 'inega ina veiuiula. <sup>26</sup> Inega 'eguma du'u taha visiqa nalobea, e 'inega du'u qabudi visiqa~nana ina vebaea. Ta wese 'idewani 'eguma du'u taha awatubo nalobea, e 'inega du'u qabudi maega ina qaiawa.

<sup>27</sup> Ni'a o'itea, omi'a qabumi Keliso 'wafina, ta wese omi'a 'aidega 'aidega du'unavo. <sup>28</sup> <sup>w</sup> Ta Yaubada ena 'ekalesia gamonaya tomotau venua'ivinidi fewa taha taha weaqina. Nugweta tovaletuyana, ta vemagilafuna tovesimasimanayavo, ta vetoina tove'ita. Ta wese vaina venua'ivinedi adi fata yani 'ebenuavoqana ina viaqidi, ta vaina adi fata tomotau ina giveaqiaiqedi, ta vaina adi fata ediamo ina iuledi, ta vaina adi fata to'ekalesia ina vanugwetedi, ta wese vaina adi fata mali mea be mali mea ina veqaayedi. <sup>29</sup> Nage to'ekalesia qabudi ina vetovaletuyana? Gebu! Nage to'ekalesia qabudi ina vetovesimasimana? Gebu! Nage qabudi ina vetove'ita? Gebu! Nage qabudi adi fata yani 'ebenuavoqana ina viaqidi? Gebu! <sup>30</sup> Nage to'ekalesia qabudi Niboana Gwalagwalana adi wila'a neidi 'inega adi fata tovevihiqa ina giveaqiaiqedi? Gebu! Nage qabuda ada fata mali bona be mali bona ge kada alamanidi kana veqaayedi? Gebu! Nage qabuda ada fata bona taha taha ge kada alamanidi kana giviledi? Yavonemi, gebu'e otaqa! <sup>31</sup> <sup>x</sup> Ta nuanuagu emi nuanua ona a'uya Niboana ena wila'a aqiaqi otaqidi 'idiega. 'Inega ba'itagana taha yani aqiaqi otaqina 'ekalesia yawaina weaqina ena ve'itemi, e ba'e yani~nana ana wawa veyoluba.

<sup>v</sup> 12:27 Lom 12:5    <sup>w</sup> 12:28 Efe 4:11-12    <sup>x</sup> 12:31 1Kol 14:1

### Veyoluba weaqina

**13** <sup>1</sup>Eguma agu fata totoa bwa'obwa'o bonadi taha taha 'idiega ena veqae, ta wese Yaubada ena tovale'ewayavo bonadiega ena veqae, ta ge egu veyolubamo tomotau weaqidi, e 'inega egu vonayavo adi noqola kavona be sagali ida lavulavua kavokavovoi nage bea ida mu'emu'e kavokavovoi. <sup>2</sup>y Nage agu wil'a Niboana Gwalagwalana 'inega agu fata Yaubada ena vona ena simana 'ifoqeyedi tomotau 'idia, ta ge egu veyolubamo, e 'inega ya'a kavona yani kavokavovo. Ta 'eguma agu fata Yaubada ena nuanua qabuna ta wese yani qabuna 'wai'waivid ena alamani aqiaqiedi, ta ge egu veyolubamo, e 'inega ya'a yani kavokavovo 'idewani. Ta wese 'eguma agu fata egu vetumaqanega bwanaga ena vonedi ta ina toa iqo, ta ge egu veyolubamo, e 'inega ya'a egu viaqayavo yani kavokavovo. <sup>3</sup>Eguma egu kulufa qabuna ena vewila'ayedi lukwalukwadi 'idia, ta wese 'wafigu ena awafelea 'ebeveguba 'inaya, ta ge egu veyolubamo, e 'inega egu viaqayavo 'idiega ge taha ve'ia aqiaqina ena lobei.

<sup>4</sup>Eguma taha toga iana veyoluba aqiaqiea, e 'inega toveyoluba~nana diana ge namaduvilei iana ena viaqayavo weaqidi, ta 'esi me ena bibitaqo ta wese atulafu 'avana. Toveyoluba ge taha vebwalaou 'inaya da'eno'eno, ta ge wese taunega dagivaneyea. <sup>5</sup>Toveyoluba aqiaqi ge nuanuana iana naveilivu veifei, ta ge taunega weaqina danuanua ta 'esi iana weaqina, ta ge wese ena gamosoalamo, be wese tomotau edi viaqa veifa 'inaya weaqidi ge danuaidi. <sup>6</sup>z Toveyoluba aqiaqi ge taha tuta daqaiawa ilivu lufeifana weaqidi, ta 'esi ilivu tunutunuqina weaqidi qaiqaiawa. <sup>7</sup>a Toveyoluba aqiaqi vita qabudi ge adi fata ina awataye ena ilivu aqiaqidi adi viaqa 'inega. Tauna tuta qabuna me ena vetumaqana yani taha taha weaqidi be, tuta qabuna me ena lu'ita vane, ta wese tuta qabuna me ena bibitaqo, ta ge ina awala tauna 'inega.

<sup>8</sup>Nawale tuta tuta 'inaya wil'a taha taha Niboana Gwalagwalana 'inega ina awala. 'Inega Niboana Gwalagwalana ena wil'a Yaubada ena vona ana simana 'ifoqe weaqina nahawala. Ba'itagana tomotau Niboana Gwalagwalana ena wil'a 'inega adi fata mali bona be mali bona ge ida alamanidi iveveqayedi, ta nawale tuta maimai 'inaya ba'e wil'a~nana nahawala. Ta wese Niboana Gwalagwalana ena wil'a 'inega ba'itagana tomotau adi fata yani qabuna ina alamania, ta tuta maimai 'inaya ba'e wil'a~nana wese nahawala. Ta 'esi veyoluba ilivuna ana 'aidega ge wese ena awalamo. <sup>9</sup>Ba'e wil'a diavona edi awala 'iuna mana tuta ba'e 'inaya Niboana Gwalagwalana ena iula ka'ewe'ewea, ta tua ge ada fata yani qabuna weaqidi kana alamanidi. Ta wese ena iula 'inega Yaubada

<sup>y</sup> 13:2 Md 17:20   <sup>z</sup> 13:6 Lom 12:9   <sup>a</sup> 13:7 1Fit 4:8

ena vona kasimasimana 'ifoqeyed, ta tua ge ada fata be kana simana 'ifoqe aqiaqiedi. <sup>10</sup> Ta 'esi tuta 'ebelu'ovoa 'inaya wila'a qabudi ina awala, mana omo'e tuta~nana 'inaya Yaubada ena waiwai 'inega yani qabuna naveaqiaqi otaqa.

<sup>11</sup> Ebevetatalutula ba'e 'inega egu vonayavo ena givesimatalia 'imia. Egu tuta gwama 'inaya egu veqae kavona gogama edi veqae, be egu nuanua 'idewani gogama, ta wese egu viaqayavo kavona gogama edi ilivu. Ta tuta~nana yave'ena'i 'inega gogama edi ilivu yanogedi. <sup>12</sup> Ba'e 'itagana yani qabuna ka'ite'itedi kavona be velovelovana 'inaya kada 'ite'itedi, ta 'inega ge ada fata be kana 'ita aqiaqiedi, ta 'esi tuta maimai 'inaya yani qabuna kana 'ita aqiaqiedi. Ta wese 'idewani ba'e 'itagana egu alamani tufwana, ta omo'e tuta~nana 'inaya yani qabuna ena alamani aqiaqiea, 'idewani Yaubada ni'a alamani aqiaqiegua.

<sup>13<sup>b</sup></sup> Ta yani ba'e toidi ina 'eno vataya: Vetumaqana be, lu'ita vane ta wese veyoluba. Ta toi~dina 'idiega veyoluba tauna veqidua va'inedi.

### Niboana Gwalagwalana ena wila'a 'ekalesia ana iula weaqina

**14** <sup>1<sup>c</sup></sup> Egwavo, veyoluba ana aqiaqi ni'a oalamani aqiaqiea, 'inega veyoluba ena ilivu ona 'abiboda aqiaqiea. Vonahaqiaqi, Niboana Gwalagwalana ena wila'ayavo qabudi ona toho waiwai adi 'ewa weaqidi, ta 'idiega Yaubada ena nuanua ana simana 'ifoqe wila'a~nana weaqina ona sali nugwetea. <sup>2</sup> Mana tomeqabu bona taha taha ge ida alamanidi ta tua adi fata ina veqaayedi, taudi ge tomotau 'idia ida vonavona, mana tomotau diavona vona diavona ge ida alamanidi, ta 'esi Yaubada 'inaya ivonavona. Tovona~nana Niboana Gwalagwalana ena waiwaiiega vonavona, ta vona diavona adi alamani 'wai'waividii tomotau 'idia. <sup>3</sup> Ta tomeqabu Niboana ena wila'a 'inega adi fata Yaubada ena nuanua ina simana 'ifoqeyed, e taudi edi vona 'inega ediavo igivewaiwaiiedi, ta ivona iuledi ta wese edi nuanua yani taha taha weaqina 'idiega igiveaqiaqiedi.

<sup>4</sup> Taha tomotau Niboana ena wila'a 'inega ana fata mali bona veveqaeyeaa, e tauna vona~nana 'inega taunega gigivewaiwaiiea. Ta 'esi taha toga Niboana ena wila'a 'inega ana fata Yaubada ena nuanua nasimana 'ifoqeyed, e tauna 'ekalesia qabuna gigivewaiwaiiedi.

<sup>5</sup> Nuanugu omi'a qabumi Niboana ena wila'a 'inega bona taha taha ami fata ona veqaayedi. Ta vonahaqiaqi, egu nuanua qiduana qabumi ami fata Niboana ena wila'a 'inega Yaubada ena nuanua ona simana 'ifoqeyed. Mana ba'e wila'a~nana yani qiduana 'ekalesia weaqidi, ta 'abiboda veqae bona taha taha 'idiega. Ta 'eguma taha toga ana fata bona~nana nagivilea, e 'inega wese yani aqiaqi otaqina, mana givila~nana 'inega 'ekalesia qabudi iula ina lobeaa.

<sup>b</sup> 13:13 1Te 1:3    <sup>c</sup> 14:1 1Kol 12:31; 14:39

6 Egwavo, 'eguma ena vayausimi ta mali bona 'inega ena veqae 'imia 'inega tola'ai ana aqiaqi? Ge taha! Ta 'esi 'eguma ena wai 'imia ta Yaubada ena ve'ita 'iguya ena ve'ita ukamanea 'imia, nage alamani aqiaqina ena neimi, nage Yaubada ena nuanua ena simana 'ifoqeyea 'imia, nage ve'ita tunutunuqina ena neimi, e ba'e yani diavona 'idiega ana fata be ena iulemi. 7 Ebevetatalatutula taha ena neimi, e ba'e: Vaina yani yawai geqadi 'idewani 'ebelaha loli be gitaha taudi ma butudi, ta 'eguma tolaha ge ina vefewa aqiaqiedi, e 'inega adi noqola naluveifa ta tovineneqa ge adi fata ina alamania to'evosi ana aniqo ilahalahayei, waisa? 8 Ta wese 'idewani 'eguma avia ana tutu 'inaya bea ina mu'e veifea, e 'inega togama na'iva'ava'ata avia weaqina? Ge taha toga! 9 Ta wese 'idewani omi'a. Ma'oda 'eguma o'a tomotau 'idia bona taha ge ida alamania una veqaeyea 'idia? Ma'oda 'inega adi fata eu vona ina alamani 'aiei? Ge adi fata, ta 'esi kavona uda vonavona kavokavovo 'idia.

10 Vonahaqiaqi, bona 'eala wawasai kana lobedi bwa'obwa'o debanaya. Ta tomeqabu iveveqaeyed, e taudi 'idia bona diavona tunutunuqidi ta wese ma adi alamani. 11 Ta ya'a weaqigu bona diavona ge taha adi simatala 'iguya. Ge agu fata tovona diavona edi veqae ena alamanidi, ta wese 'idewani taudi, ge adi fata ya'a egu vona ina alamania 'eguma bonagu 'inega yaveveqae 'idia. 12 Omi'a nuanuami qiduana Niboana Gwalagwalana ena wila'ayavo naneimi ona 'ewedi. E ba'e yani aqiaqi otaqina. Ta nuanuagu wila'a taha taha adi fata 'ekalesia ina givewaiwaiae ona sali aqiaqiedi, ta ona venoqi Yaubada 'inaya adi 'ewa weaqidi.

13 Ta wese 'eguma taha toga ana wila'a 'inega ana fata taha bona 'wai'waivina naveqaeyea, e luaqiaqiea be wese navenoqi givila ana wila'a weaqina be yaqisa bona~nana veveqaeyea ana fata taunega nagivilei ta nagivesimatalia 'ekalesia qabudi 'idia, 'inega vona~nana ina alamania ta ina vewaiwai. 14 Mana 'eguma yavevenoqi bona taha 'wai'waivina 'inega, ta bona~nana ge eda alamania, e 'inega niboaniguyega yavevenoqi Yaubada 'inaya.

15 'Inega tola'ai ena viaqi? Nuanuagu qiduana yani magilafudi ena viaqidi. Nuanuagu ena venoqi mali bonayega niboanigu 'inega, ta wese bonaguyega. Ta nuanuagu ena 'evosi mali bonayega niboanigu 'inega, ta wese bonaguyega. 16 Ona nuaia, 'eguma taha toga 'imiega mali bona 'inega uvevenoqi niboaniu 'inega Yaubada 'inaya, e 'inega ma'oda emwavo venoqi~nana ina alamania ta ina 'awahaqiaqiei? Ge adi fata. 17 Nage o'a eu venoqi mali bona 'inega aqiaqi otaqina, ta ma'oda emwavo? Taudi venoqi~nana 'inega ge taha iula ida lobei.

18 Omi'a Yaubada Niboanina ena iula 'inega mali bona be mali bona 'idiega ovonavona, ta ya'a mali bona adi toveqaeavo yaveqidua va'inedi, ta ba'e weaqina yalulukaiwa Yaubada 'inaya. 19 Ta 'esi 'eguma kana toava'auta tafwalolo weaqina, e 'inega ge nuanuagu vona kuena mali

bona 'inega ena neimi, ta 'esi vona kukusana simasimatalidi bonamiega ena 'inanedi 'imia.

<sup>20<sup>d</sup></sup>

Egwavo, gogama goyogoyodi ge ida nuanua qiduana yani taha taha weaqina, 'inega omi'a ge ona vegogama tuta~nana ba'e yani diavona weaqina onuanua, mana taudi nua kavokavovodi itoatoa ta yani qabuna weaqina ge nuadi da'eqa'uya. Ta 'esi omi'a tuta~nana Niboana Gwalagwalana ena wila'a weaqidi onuanua, e 'inega ona nuanua kavona tomotau edi nuanua fa'alina 'idewani. <sup>21<sup>e</sup></sup>

Buki Nugwenugweina vonaya,

"Ya'a Kaiwabu egu tomotau  
me Diu mali bona 'inega  
ena vona 'idia,  
ta wese ena vona 'idia  
mali tomotau meadiega.

Ta ge nuanuadi egu vona  
ina noqoli,  
'inega yavona 'wayoqa 'idia."

<sup>22-23<sup>f</sup></sup>

Yavona aqiaqiemi, Niboana Gwalagwalana ena wila'a mali bona weaqina tomotau neidi, ta wila'a~nana taha 'ebe'ita taudi ge ida vetumaqana weaqidi, ta gebu tovetumaqana weaqidi. Mana 'eguma omi'a tovetumaqana ovava'auta tafwalolo weaqina ta qabumi mali bona be mali bona ge oda alamanidi 'idiega ovonavona, ta vaina tomotau ge ida vetumaqana ilugu mai ivivineneqemi ta ilivu~nana ge ida alamania, e 'inega ina vonemia, "Aa, omi'a ni'a ovekwavakwawa!" <sup>24<sup>g</sup></sup>

Ta 'esi Niboanina ena wila'a Yaubada ena nuanua ana simana 'ifoqe weaqina yani aqiaqi otaqina taudi ge ida vetumaqana weaqidi. Mana 'eguma qabumi otawatafwalolo ta Yaubada ena nuanua osimasimana 'ifoqeyedi, ta taudi ge ida vetumaqana nage ge taha ida alamania tafwalolo weaqina ilugu mai ta vona diavona inoqonoqolidi. E 'inega emi simana 'idiega nuadi na'eqa'uya ta edi luveifana ina alamani aqiaqiea. <sup>25</sup>Ta wese tuta~nana emi simana inoqonoqolidi edi nuanuayavo 'wai'waividii giwalidiega ina 'ifoqe ta tuqatuqadiega ina sobadi ta ina simana 'ifoqe ina vonemia, "Vonahaqiaqi, Yaubada omi'a maega!"

### Tafwalolo ana ve'eda tunutunuqina

<sup>26<sup>h</sup></sup>

Egwavo, egu ve'ita diavona ana bwagila ba'e 'idewani: Tuta~nana ona va'auta tafwalolo weaqina, e 'inega taha tomotau na'evosi. Ta taha tomotau nave'ita. Ta taha tomotau ve'ita Yaubada 'inega nave'ita ukamanea 'imia. Ta taha tomotau mali bona Yaubada Niboanina 'inega naveqaeyea, ta wese taha tomotau bona~nana nagivilea ta nagivesimatalia. Ta ba'e

<sup>d</sup> 14:20 Efe 4:14    <sup>e</sup> 14:21 Ais 28:11-12    <sup>f</sup> 14:22-23 Via 2:13    <sup>g</sup> 14:24 Ion 16:8

<sup>h</sup> 14:26 1Kol 12:8-10

yani diavona omi'a 'ekalesia ami 'ebegivewaiwai. <sup>27</sup>Ta emi va'auta~nana 'inaya 'eguma vaina 'imiega nuanuadi mali bona 'idiega ina vona, e 'inega magilafudi nage toidi 'aideganega 'aideganega ina tovolo ina vona. Ta 'abibodanaya taha tomotau natovolo vona diavona nagiviledi ina simatala qabumi 'imia. <sup>28</sup>Ta 'eguma ge taha bona~nana ana togivila datoatoa, 'inega ge taha toga wese natovolo ta mali bona 'inega navonavona. 'Inega luaqiaqiea be nagenu'wana emi tafwalolo 'inaya, ta 'esi tauna nuanega naveqae mali bona 'inega Yaubada 'inaya, 'inega ge taha toga nanoqoli.

<sup>29<sup>i</sup></sup> Ta wese emi tafwalolo 'inaya Yaubada ena nuanua ana tovesimasimanayavo magilafudi nage toidi ina simana 'imia, ta omi'a simana diavona ona vineneqa aqiaqiedi 'eguma Yaubada 'inega 'ifo'ifoqe, nage mali niboana 'inega. <sup>30</sup>Ta 'eguma taha tomotau Yaubada ena nuanua simasimana 'ifoqeyedti, ta iana taha ve'ita Yaubada 'inega 'ewe, e 'inega tosimana~nana natoabui, nagenu'wana ta iana ve'ita~nana nagivesimatalia 'ekalesia 'imia. <sup>31</sup>Mana 'eguma ba'e 'idewani ona viaquia, e 'inega tovesimasimana qabudi adi fata ina tovolo, ta 'aidega 'aidega ina simana be yaqisa simana~nana 'inega qabumi alamani ona 'ewei ta nagivewaiwaiemi. <sup>32</sup>Ta ge ona nuafania Yaubada ena tovesimasimanayavo niboanidi 'inega adi fata taudiega ina luvinedi, e 'inega wese adi fata ina ba'eba'e ana laba iadi nalua'u 'inega wese 'aidega 'aidega ina tovolo sabi simana. <sup>33</sup>Mana Yaubada ge nuanuana ada wila'a Niboana Gwalagwalana 'inega kana vefewa veifedi, ta 'esi nuanuana kana vefewedti 'eda tunutunuqina 'inega be yaqisa toadaumwala kana lobea.

<sup>34<sup>j</sup></sup> Ta Yaubada ena 'ekalesia qabudi 'idia vivine ina toagenu'wana tafwalolo ana tuta 'inaya, mana ge daluaqiaqiedi be ina veqae. Ta 'esi ina awafeledi moqanediavo 'idia, Buki Nugwenugweina ena simana 'idewani. <sup>35</sup>Ta 'eguma vivine nuanuadi taha yani weaqina ina alamania, 'inega luaqiaqiedi be tafwalolo 'abibodanaya moqanediavo ina vetala'aiedi edi vanuea. Mana 'eguma tafwalolo ana tuta 'inaya ina vona, e 'inega taudiega ina giveiniuyaunidi.

<sup>36</sup>Ma'oda, nage Yaubada ena vona omi'a me Kolinita 'imiega 'ifoqe mai? Ana 'ita, gebu! Nage omi'a ami 'aidega vona diavona o'ewedti. Yavonemi, gebu otaqa! <sup>37<sup>k</sup></sup> Ta 'eguma taha toga 'imiega unuaia be o'a Yaubada ena nuanua ana tosimana aqiaqi, nage o'a uvonaya be Niboana Gwalagwalana ena waiwai tuta qabuna 'iuya fewafewa. E 'inega una alamani aqiaqiea, ba'e vona diavona ge ya'a egu nuenuega eda 'wayavidi, ta 'esi eda Kaiwabu luvinegu be 'inega ya'wayavidi. <sup>38</sup>Ta 'eguma taha toga vona diavona nanogedi, e 'inega Yaubada wese tomotau~nana nanogea.

<sup>39</sup>'Inega egwavo, 'eguma tafwalolo ana tuta 'inaya nuanuami qiduana Yaubada ena nuanua ona simana 'ifoqeyedti 'inega luaqiaqiemti be ona

<sup>i</sup> 14:29 1Te 5:21    <sup>j</sup> 14:34 1Kol 11:3; 1Tim 2:12    <sup>k</sup> 14:37 1Ion 4:6

viaqia. Ta wese 'eguma emiavo nuanuadi mali bona be mali bona ge ida alamanidi 'idiega ina vonavona, e 'inega gebu ona awatayedi. <sup>40</sup> Ta luaqiaqiemi be tuta~nana ovava'auta yani qabuna ona viaqidi tafwalolo ana ve'eda aqiaqi 'inega 'idewani ni'a yave'ita 'aqememi.

### Keliso ena ya'itoto 'evivi 'aligega weaqina

**15** <sup>1</sup>Egwavo, tuta ba'e nuanuagu Ieisu Valena Aqiaqina weaqina ena lu'eviviea 'imia. Ba'e Vale~nana lova yalugaihiea 'imia ta o'ewa aqiaqiea be wese ovetumaqanea. Ta ba'itagana Vale~nana 'inaya otovolo'i'ita. <sup>2</sup>Vonahaqiaqi, 'eguma ba'e Vale~nana ona vetumaqana aqiaqiea be ona kafi'i'ihia 'inega 'etoyavua ona lobeia. Ta 'eguma Vale~nana ona nogea, e 'inega emi vetumaqana yani kavokavovo 'idewani.

<sup>3</sup><sup>l</sup> Ieisu Valena ana avutugu yamadunoqolia, ta 'abibodanaya avutugu~nana yave'itemi, mana Vale~nana yani qiduana weaqina simanea, e ba'e: Ieisu eda lufeifana qabudi weaqidi 'aliga, 'idewani lova Buki Nugwenugweina simana 'ifoqeyea. <sup>4</sup><sup>m</sup> Ta Buki~nana wese simanayea Keliso itavunia, ta 'aubena vetoina 'inaya Yaubada giveya'itoto 'eviviea 'aligega, <sup>5</sup><sup>n</sup> 'inega Fita matanaya 'ifoqe ta 'itea, ta 'abiboda wese 'ifoqe taudi Tuwelo~dina matadia. <sup>6</sup>Ta 'abibodanaya tuta~nana ana to'abibodayavo adi yau faibi anidedi (500) iva'auta 'aideganaya, e 'inega matadia 'ifoqe. Ta 'idiega vaina ni'a i'aliga, ta 'ea'ealidi nawale mayawaiido itoatoa. <sup>7</sup><sup>o</sup> 'Inega wese 'ifoqe Iemesa 'inaya, ta 'abibodanaya 'ifoqe tovaletuyana qabudi matadia. <sup>8</sup><sup>p</sup> Ta 'ebelu'ovoia wese 'iguya 'ifoqe mai ya'itea. Ta ya'a kavona gwama dav'i'oi galigali'e ge ena tuta dalobei 'idewani. <sup>9</sup><sup>q</sup> Vonahaqiaqi, tovaletuyana qabudi iveqidua va'inegu, ta ge daluaqiaqiegu be ina gabegu tovaletuyana, mana ya'a Yaubada ena tomotauyavo lova yavevoalanedi.

<sup>10</sup><sup>r</sup> Ta 'esi Yaubada ena nuakolokolo 'inega veilivu aqiaqiegu ta yavetovaletuyana 'inaya. Ta ena nuakolokolo qiduana 'iguya ge eda vefewa kavokavovoyei. Ta 'esi ma vuaqina, mana ya'a tovaletuyana qabudi edi fewa 'inega yaveqidua va'inedi. Ta egu fewa~nana qiduana ge taugu egu waiwai 'inega, ta 'esi Yaubada ena veyoluba 'iguya 'inega. <sup>11</sup>Tovaletuyana vaina wese ni'a ilugaihi 'imia. Ta ge wese taha tola'ai 'eguma taudi edi lugaihi 'inega Ieisu Valena ovetumaqanea nage ya'a egu lugaihi 'inega, mana Vale~nana 'aidegana alugaihiea 'imia.

### To'aliga edi ya'itoto 'evivi

<sup>12</sup>Ta 'eguma lova ima'a ema lugaihi 'inaya asimana 'imia Keliso ni'a ya'itoto 'evivi 'aligega, 'inega tola'ai weaqina vaina 'imiega ovonavona

<sup>1</sup> 15:3 Ais 53:5-12   <sup>m</sup> 15:4 Md 12:40; Via 2:24-32   <sup>n</sup> 15:5 Lk 24:34; Md 28:16-17

<sup>o</sup> 15:7 Via 1:3-4   <sup>p</sup> 15:8 Via 9:3-6   <sup>q</sup> 15:9 Efe 3:8; 1Tim 1:15   <sup>r</sup> 15:10 2Kol 11:23

vonigo ge taha toga ana fata naya'itoto 'evivi 'aligega? <sup>13</sup> Mana 'eguma tomotau 'aligega ge ina ya'itoto 'evivi, 'inega wese Keliso 'aligega ge daya'itoto 'evivi. <sup>14</sup> Ta wese 'eguma Keliso ge daya'itoto 'evivi, e 'inega ema lugaihiavo 'imia yani kavokavovo, ta wese emi vetumaqana 'iu geqana. <sup>15</sup> Ta 'eguma ge taha toga ana fata naya'itoto 'evivi 'aligega, e 'inega ima'a tovaletuyanayavo Yaubada weaqina ni'a au'avemi, mana ima'a alugaihi 'imia Yaubada Keliso giveya'itotoya 'aligega weaqina. Ta 'eguma omi'a emi nuanua ba'e 'idewani, 'inega Yaubada Keliso ge dagiveya'itoto 'eviviei. <sup>16</sup> Mana 'eguma to'aliga ge adi giveya'itotomo, 'inega wese Yaubada Keliso ge dagiveya'itotoi, 'inega emi vetumaqana ge ana aqiaqimo, ta 'esi omi'a nawale me emi luveifana otoatoa, ge adi nuataqomo. <sup>18</sup> Ta wese 'eguma omi'a ba'e 'idewani onuanua 'aiqa, e 'inega tovetumaqana yawaidi ni'a gumwala taudi i'waiva vataya. <sup>19</sup> Ta 'eguma eda lu'ita vane Keliso 'inaya ge tuta maimai weaqina, ta 'esi eda toa ba'idia bwa'obwa'oya namo weaqina, e 'inega ita'a nuakolokoloda, ta 'abiboda mali tomotau.

<sup>20</sup> Ta vonahaqiaqi, Yaubada Keliso ni'a giveya'itoto 'eviviea 'aligega! 'Inega ve'ebe'ita 'idaya tovetumaqana yawaidi ni'a gumwala taudi wese nawale nagiveya'itoto 'eviviedi.

<sup>21</sup> <sup>s</sup> O'itei, 'oloto 'aidegana ana wawa Adama 'inega 'aliga 'ifoqe bwa'obwa'oya, ta wese taha 'oloto ana wawa Keliso 'inega ya'itoto 'evivi 'ifoqe, mana Keliso~nana maduya'itoto 'evivi 'aligega. <sup>22</sup> Tomotau qabuda kana 'aliga, mana ita'a Adama enavo ta wese eda ilivu 'aidegana. Ta wese 'idewani tovetumaqana qabuda kana yawah 'evivi 'aligega, mana ni'a kave'aidega Keliso maega. <sup>23</sup> <sup>t</sup> Ta ya'itoto 'evivi ana ve'eda ba'e 'idewani na'ifoqe 'aiqa: Yaubada ni'a Keliso giveya'itoto 'eviviea, ta tuta~nana na'evivi namai bwa'obwa'oya 'inega wese ena tomotauyavo ina ya'itoto 'evivi 'aligega.

<sup>24</sup> E 'inega tuta 'ebelu'ovoa nave'ale. Ta tuta~nana 'inaya Keliso niboana luveifadi adi toluvineavo be, toluvine qabudi ge nuanuadi Yaubada, ta wese yani qabudi waiwaidi naluveawalidi. Ta 'abibodanaya ena 'Ebeluvine nave'ineiea Tamana Yaubada 'inaya. <sup>25</sup> <sup>u</sup> Mana Yaubada ena nuanua 'inega Keliso naluvine ana laba voalanavo qabudi navewaiwai va'inedi, 'inega ena luvine 'ayanaya ina toatoa. <sup>26</sup> <sup>v</sup> Ta Keliso ana avia 'ebelu'ovoa ana wawa 'aliga, ta Keliso 'aliga~nana navewaiwai va'inei ta naluveawalia. <sup>27</sup> <sup>w</sup> Mana Buki Nugwenugweina vonaya, "Yaubada 'abiluvine neia 'inega yani qabudi ina toatoa ena luvine 'ayanaya." Ta vona diavona adi noqola kavona Keliso Tamana Yaubada daluluvinei. Ta vona diavona adi alamani ba'e: Keliso ge wese Tamana daluvinei,

<sup>s</sup> 15:21 Lom 5:12   <sup>t</sup> 15:23 1Te 4:16; Ve 20:5   <sup>u</sup> 15:25 Md 22:44   <sup>v</sup> 15:26 Ve 20:14

<sup>w</sup> 15:27 Same 8:6

mana Tamana toludebana, ta 'esi ena 'abiluvine neia Natuna 'inaya.<sup>28</sup> Ta tuta~nana Keliso yani qabudi ni'a vewaiwai va'inedi ta ena 'abiluvine 'ayanaya itoatoa, e 'inega taunega nahawafelea Tamana ena 'abiluvine 'ayanaya. 'Inega Yaubada ana 'aidega kuyavata qabudi naluvinedi ta wese na'itamakidi.

<sup>29</sup> Omi'a vaina ovonaya vonigo ge taha toga ana fata 'aligega naya'itoto 'evivi. 'Inega tola'ai weaqina to'aliga weaqidi babitaiso o'ewe'ewei? Tola'ai ana aqiaqi?

<sup>30</sup><sup>x</sup> 'Eguma emi vona vonahaqiaqi, 'inega tola'ai weaqina tuta qabuna ya'a ma egwavo yawaima ahawahawafelei 'ebeveilaqe 'inaya?<sup>31</sup> Egwavo, 'aubena 'aidega 'aidega 'idia Iesu Valena weaqina ya'ali'aliga 'waqi. Ta tua me egu 'asima'ala yaqaiqiaawa. Ba'e vona diavona vonahaqiaqi, mana omi'a be ya'a ni'a kave'aidega Keliso Iesu maega, tauna eda Kaiwabu.<sup>32</sup><sup>y</sup> Ta tuta~nana 'abaga Efeso 'inaya yatoatoa, 'inega vaina tomotau kavona yubai sasasadi maega avevedavi. Ta ge ana aqiaqimo 'iguya 'eguma vedavi~nana 'inaya eda 'aliga, ta gebu eda vetumaqana tuta maimai 'inaya tovetumaqana qabuda 'aligega kana ya'itoto 'evivi. Mana 'eguma ge eda vetumaqana 'inega ya'a wese eda vona 'idewani vaina tomotau ivonaya,

“Kana 'ai kana numa,  
mana 'ibe kana 'aliga.”

<sup>33</sup> Ta ba'e vona~nana ge wese ona 'abibodei. Eda vona qiduana taha 'eno'eno vonaya, “Tomotau luveifadi maega ge ona veiaiana, mana nawale edi ilivu luveifadi ina veukamemi, 'inega omi'a emi ilivu aqiaqidi ina awala.”<sup>34</sup> Nuanuagu emi nuanua ina vetunutunuqa lova 'idewani, ta wese emi ilivu luveifadi ona nogedi. Ta yavonemi, luqiaqiaemi be ona iniyauyau, mana vaina 'imiega Yaubada ge oda alamania.

### Ya'itoto 'evivi ana tuta 'inaya 'wafida navevauvau

<sup>35</sup> Nage taha toga navetala'ai navonaya, “Ma'oda 'inega to'aliga adi fata ina ya'itoto 'evivi? Ta ma'oda 'wafidi ana 'ita?”<sup>36</sup><sup>z</sup> Ba'e vetala'ai~nana kavona tovekwavakwava edi vetala'ai. Kana nuaia, tuta~nana vewana kana daunia 'eguma tubuna ge namadudavula bwa'obwa'o gamonaya ta na'aliga, e 'inega ge ana fata natabo ta 'waena kana 'itei.<sup>37</sup> Ni'a kahalamania, 'eguma boada nage 'abwaga taha taha kana 'wadidi, e 'inega gebu ma 'abwagana kana 'wadia, ta 'esi vewaninamo.<sup>38</sup> Abiboda ina tabo ta 'abwagadi Yaubada ena nuanua 'inega adi 'ita taha taha ina 'ifoqe.<sup>39</sup> Ta wese 'idewani yani qabuna mayawaidi 'wafidi adi 'ita taha taha. Ita'a tomotau 'wafida taha be, yubai kawakawalidi 'wafidi taha be, manuqa 'wafidi taha, ta wese 'iqana 'wafidi ana 'ita dumadumana.

<sup>x</sup> 15:30 Lom 8:36    <sup>y</sup> 15:32 Ais 22:13    <sup>z</sup> 15:36 Ion 12:24

<sup>40</sup> Idewani wese mahala ana totoayavo 'wafidi taha. Ta wese ita'a totoa bwa'obwa'oya 'wafida taha. 'Inega 'eguma 'wafi diavona kana 'itedi kana giveleqedi 'inega adi 'ita dumadumana be dumadumana. Totoa mahalaya 'wafidi adi 'ita aqiaqi otaqina, ta ita'a totoa bwa'obwa'oya 'wafida adi 'ita dumadumana, ta tua 'wafida adi 'ita wese aqiaqi otaqina. <sup>41</sup> Baba'au ena simatala ana 'ita taha, ta wai'ena ena simatala ana 'ita taha, ta wese 'wadi'wadima edi simatala ana 'ita taha. Ta 'wadi'wadima 'aidega 'aidega adi 'ita be wese edi simatala dumadumana be dumadumana.

<sup>42</sup> Ta wese 'idewani nawale na'ifoqe to'aliga 'idia tuta~nana ina ya'itoto 'evivi. Mana 'wafidi 'ali'aligina itavunia nadavula, ta nawale tuta~nana Yaubada nagiveya'itoto 'eviviedi 'aligega 'wafi vauvauna 'inega ina ya'itoto 'evivi. Ta ba'e 'wafi~nana 'eno'eno vatayana, ge ena awalamo. <sup>43<sup>a</sup> To'aliga kana tavunia 'wafina ana 'ita ge aqiaqina, ta 'esi tuta~nana 'aligega naya'itoto 'evivi 'inega 'wafina ana 'ita aqiaqi otaqina. Wese 'idewani to'aliga kana tavunia 'wafina dawalilina, ta tuta~nana naya'itoto 'evivi 'inega 'wafina waiwaina. <sup>44</sup> Ita'a tomotau bwa'obwa'oya katoatoa ma 'wafida. Ta nawale kana 'aliga, 'inega ya'itoto 'evivi 'aligega ana tuta 'inaya 'wafida naveniboana. Mana ni'a kahalamania bwa'obwa'o 'wafina tauna eda toa bwa'obwa'oya weaqina. Ta nawale 'wafi vauvauna eda toa vataya mahalaya weaqina Yaubada naneida, ta ba'e 'wafi~nana Niboana Gwalagwalana 'inega nayawaha 'evivi.</sup>

<sup>45<sup>b</sup> Buki Nugwenugweina ena simana vonaya, "Oloto nugwenugweina ana wawa Adama Yaubada ena 'iva'ava'ata 'inega vetomotau mayawaina", ta Adama 'ebelu'ovoaa ana wawa Keliso, tauna yawai vataya ana tonei Niboana Gwalagwalana 'inega. <sup>46</sup> 'Wafida eda toa mahalaya weaqina ge kada madu'ewei, ta vonahaqiaqi 'wafida eda toa bwa'obwa'oya weaqina ka'ewa nugwetedi, ta 'abiboda 'wafida vauvauna mahala weaqina kana 'ewed. <sup>47</sup> Yaubada 'oloto nugwenugweina Adama viaqia bwa'obwa'o fwayaquna, 'inega tauna totoa bwa'obwa'o. Ta 'esi Adama 'ebelu'ovoaa tauna mahalega mai. <sup>48</sup> Tomotau qabuda 'wafida eda toa bwa'obwa'oya weaqina 'idewani Adama 'wafina. Ta wese tuta maimai 'inaya 'wafida mahala ana toa weaqina kana 'eweia 'idewani Keliso 'wafina. <sup>49</sup> Tuta ba'e 'inaya ita'a totoa bwa'obwa'o 'wafida adi 'ita 'idewani Adama ana 'ita, mana tauna bwa'obwa'o 'olotona. Ta nawale tuta maimai 'inaya ada 'ita 'idewani mahala 'olotona tauna Keliso.</sup>

<sup>50</sup> Egwavo, yavona aqiaqiem, ge ada fata 'wafi otaqida ma vei'ona ta wese ma sulalina kana luguyei Yaubada ena 'Ebeluvine 'inaya. Mana 'wafida nawale ina davula ta ina awala, 'inega ge ada fata kana luguyedi di'we 'ebetoea vataya 'inaya.

<sup>a</sup> 15:43 Fil 3:20-21    <sup>b</sup> 15:45 Nug 2:7

<sup>51 c d</sup> Nuanuagu taha yani 'ebenuavoqana ena vona 'ifoqeyea 'imia Yaubada 'inega. Ovineneqa! Ita'a tovetumaqana qabuda ge kana 'aliga, ta 'esi nawale qabuda kana vedumaduma. <sup>52</sup> Ba'e yani~nana na'ifoqe lukwayavonega, kavona be namala da'waia. Ta tuta~nana 'inaya bea ana mu'e 'ebelu'ovoa ina mu'ea. Mana tuta~nana bea~nana nadou 'inega tovetumaqana lova i'aligaya fusa dumadumana 'inega ina ya'itoto 'evivi. Ta 'abibodanaya ita'a mayawaida katoatoa 'wafida adi 'ita wese navedumaduma be yaqisa ge wese ana fata kana 'aliga. <sup>53 e</sup> Mana Yaubada ena nuanua 'inega 'wafida davudavulidi be 'ali'aligidi nagivedumedumedi eda toa vataya mahalaya weaqina, 'inega ge wese adi fata ina 'aliga.

<sup>54 f</sup> Ta tuta~nana 'wafida 'ali'aligina ina vevauvau 'idewani 'wafi ge adi fata ina 'aliga 'evivi, e 'inega Yaubada ena vona ana aqiaqi na'ifoqe vonaya,

“Yaubada 'aliga ena waiwai  
vewaiwai va'inea ta luveawalia!”

<sup>55 g</sup> “Aliga, eu waiwai ma'inaya?  
Ana 'ita ni'a awala.  
'Aliga, eu 'ebevedavi ma'inaya?  
Ana 'ita ni'a awala!”

<sup>56 h</sup> Mana 'aliga ena waiwai ilivu luveifana 'inega maimai, ta ilivu luveifana ena waiwai Mosese ena luvine 'inega maimai. <sup>57</sup> Ta kana lukaiwa qiduana Yaubada 'inaya, mana Iesu Keliso eda Kaiwabu ena waiwai 'inega 'aliga ena waiwai kavewaiwai va'inea.

<sup>58</sup> 'Inega egwavo, ona tovolo'i'ita ta ge ona nidoa. Tuta qabuna me emi gwavubiga eda Kaiwabu ena fewa weaqina, mana ni'a oalamani aqiaqiea fewa~nana eda Kaiwabu 'inaya ge wese yani kavokavovo, ta 'esi ma vuaqina.

### Nei kavovo Yaubada ena tomotauyavo weaqidi

**16** <sup>1 i</sup> Tuta ba'e 'inaya nuanuagu ena vona 'eviviemi emi vetala'ai mane ana nei kavovo weaqina Yaubada ena tomotauyavo 'abaga Ielusalema 'inaya itoatoa weaqidi. Ta omi'a nei kavovo~nana ona viaqia 'idewani lova me Galetia yavonedi iviaqia. <sup>2</sup> Sabate 'aidega 'aidega tomotau taha taha ena mane ena fewa ana ve'ia 'inega taunega vaina naluluveaquea. 'Eguma taha toga mane qiduana ni'a 'ewe, e 'inega wese mane tufwana 'ala'ena'ina naluluveaquea. Ta 'eguma taha toga mane goyon aloba, e 'inega mane tufwana goyon aloba naluluveaquea. Ba'e 'idewani ona viaqa 'aika, 'inega ge taha nei kavovo kana viaqi tuta~nana ena vayausimi, ta 'esi mane nonoqina ona neigu. <sup>3</sup> Ta emi 'ekalesia gamonaya

<sup>c</sup> 15:51-52 Md 24:31    <sup>d</sup> 15:51 1Te 4:15-17    <sup>e</sup> 15:53 2Kol 5:4    <sup>f</sup> 15:54 Ais 25:8

<sup>g</sup> 15:55 Ose 13:14    <sup>h</sup> 15:56 Lom 7:13    <sup>i</sup> 16:1 Lom 15:25-26; 2Kol 8:1-9

taudi ma adi vetumaqana ona venua'ivinedi nei kavovo~nana ina 'ewei ina tauyea Ielusalema 'inaya. Ta ona ba'eba'eyegu ena wai 'imia, 'inega vaina leta ena 'wayavidi ina tauyedi. 'Inega me Ielusalema ina alamani aqiaqiea nei kavovo~nana ana vefewa weaqina.<sup>4</sup> Ta 'eguma omi'a onuaia luaqiaqiegu be ya'a wese ena tauya Ielusalema 'inaya, e 'inega taudi maega ana tauya.

### Faulo ena nuanua

<sup>5<sup>j</sup></sup>

Egu nuanua be ena vayausimi, ta nugweta ena tauya di'we Masidonia 'abaganavo 'idia sabi 'itadi, ta 'abiboda omi'a. <sup>6<sup>k</sup></sup>

Ta egu toa ana liva omi'a maega ge eda alamani aqiaqiei, e 'inega ge agu fata ena simana weaqina 'imia. Ta ana 'ita nawale omi'a maega kana toatoa ta guga'u ana tutu nave'ale, e 'inega tufwana kana toa 'amana. Ta 'abiboda emi iula 'inega ona vetunegu ena tauya wese vaina 'abaga 'idia. <sup>7</sup>Ta ge nuagu vemaniniega vayausa~nana ena viaqi ta lukwayavonega ena nogemi. Ta 'esi nuanuagu tutu kuena omi'a maega kana toatoa 'eguma eda Kaiwabu wese ena nuanua 'idewani. <sup>8</sup>Inega ba'idia 'abaga Efeso 'inaya ena toa ana laba Fenitikosi Sagalina nagumwala, ta 'abiboda ena wai sabi 'itami. <sup>9<sup>l</sup></sup>

Ba'e 'abaga~nana 'inaya ana fata be fewa qiduana ena viaquia Yaubada weaqina, mana me Efeso tufwana qabudi ni'a inuagivila ta Iesu ivetumaqanea. Ta wese vaina agu aviayavo itoatoa, 'inega nuanuagu Iesu Valena ena nei vatayedi.

<sup>10<sup>m</sup></sup>

'Eguma Timoti nawai 'imia e 'inega ona veilivu aqiaqiea ta ona 'amayabea, mana tauna wese eda Kaiwabu weaqina fewafewa 'idewani ya'a yafewafewa. <sup>11<sup>n</sup></sup>

'Inega ge taha toga 'imiega iada~nana na'ita kavokavovoyei! Ta 'esi ona iulea ta me ena nuadaumwala ona vetunei na'evivi namai 'iguya, mana Timoti ta wese Iesu ana to'abibodayavo vaina maega yaba'eba'eyedi. <sup>12<sup>o</sup></sup>

Ta wese taida Afolosa weaqina ena vemamatagilafuyemi. Ya'alakeikeiea dawai davayausimi vaina edavo iwaiwai maega. Ta 'itagana ge nuana nawai, ta 'eguma taha tutu 'inaya meaqana, e 'inega nawai.

### Faulo ena vona 'ebelu'ovoa

<sup>13</sup>Egwavo, ona 'itamaki aqiaqie mi, ta emi vetumaqana 'inaya ona tovolo'i'ita. Ta wese me emi giwalifatu be me emi waiwai ona toatoa. <sup>14</sup>Ta emi viaqa qabudi veyolubega ona viaviaqidi.

<sup>15-16<sup>p</sup></sup>

Ni'a oalamania di'we Akaya 'inaya Setefano me ena susuyavo taudi imadunuagivila Keliso 'inaya. Ta ni'a iawafeledi Yaubada ena tomotauyavo adi iula weaqina. Egwavo, egu noqi waiwaina 'imia, ba'e

<sup>j</sup> 16:5 Via 19:21    <sup>k</sup> 16:6 Lom 15:24    <sup>l</sup> 16:9 Via 19:8-10; 2Kol 2:12    <sup>m</sup> 16:10 1Kol 4:17

<sup>n</sup> 16:11 1Tim 4:12    <sup>o</sup> 16:12 1Kol 3:6    <sup>p</sup> 16:15-16 1Kol 1:16

taudi tomotau diavona ona awafeleme 'idia, ta wese ona awafeleme tomeqabu taudi maega ifewafewa Yaubada weaqina 'idia. <sup>17-18</sup> Yaqaiawa qiduana tuta~nana Setefano be, Fotioneto ta wese Akaiko i'ifoqe 'iguya. Toi~dina iluseanimi ta iulegu mana omi'a 'abagaya otoatoa. Ta wese niboanigu igiveqaiawea 'idewani omi'a igiveqaiawemi. Ba'e tomotau diavona luquiaqiedi be 'awahaqiaqi ta wese 'amayaba ina lobeia 'imiega edi fewa aqiaqidi weaqina.

<sup>19<sup>a</sup></sup> 'Ekalesia qabudi di'we Eisia 'inaya edi lukaiwa ivetunei waiwai 'imia. Iada Akwila ma moqanena Filisila ta wese vaina tovetumaqana maega ivava'auta tafwalolo weaqina edi vanuea. E taudi wese edi lukaiwa qiduana eda Kaiwabu ana wawega 'imia. <sup>20</sup> Ta wese edavo qabudi edi lukaiwa 'imia. Omi'a qabumi 'aidega 'aidega veyolubega ma emiavo ona lukaiwa venima sibutuyega.

<sup>21</sup> Ta wese ya'a Faulo egu lukaiwa 'imia, ta lukaiwa~nana taugu nimaguyega ya'wayavia waiwai 'imia.

<sup>22<sup>r</sup></sup> 'Eguma taha toga eda Kaiwabu ge daveyolubei 'inega nawale Yaubada ena nualuveifa 'inega tomotau~nana naluvematasabuya 'aiwe 'ala'alata 'inaya. Kaiwabu ye, nuanuama una mai!

<sup>23</sup> Nuanuagu eda Kaiwabu Ieisu ena nuakolokolo 'imia na'eno'eno.

<sup>24</sup> Egu veyoluba qabumi 'imia Keliso Ieisu ana wawega.

---

<sup>a</sup> 16:19 Via 18:2,18,26    <sup>r</sup> 16:22 Gal 1:8-9; Ve 22:20